

駁陽先生存稿

吳敬恆題



射陽先生存稿卷之三

論

秦璽

世有習其名而不思其實者秦璽是也夫璽之重夫秦久矣天下後世謂之曰傳國寶自始皇以來莫之有異也愚則以爲是璽也奚以秦爲哉帝王之有天下所恃以立國者果在於璽耶不在於璽耶璽果在於秦耶不在於秦耶所謂傳國寶者國以寶而傳耶寶以國而傳耶甚哉習舊之非而好奇之過也且吾嘗考于天子之璽矣其制則玉其用則信夫苟玉焉則玉人之所掌者亦衆矣圭瓚以祭圭璧以朝環玦以佩鳴球以擊牙璋以師旅其與璽之行文書一也夫苟以信也則使節之信於邦國也旌傳之信於關梁也兵符之信於軍壘也與璽之信於朝廷一也諸不秦之貴而獨璽焉何也夫以其創始歟則未璽之

前未聞其有秦未秦之前未聞其無璽眷眷而秦之慕不亦大惑也哉然物之貴於世者亦有之矣先聖之所遺則以昭德闕里之車服是也神明之所傳則以垂範東序之河圖是也祖宗之分器則以示守夏后之璜周室之琬琰是也夫秦也德耶範耶守耶蔑仁義而重威刑四海離矣壞王制而焚詩書黔首疑矣禮樂不聞而律令是訓二世不保矣三者咸無焉斯秦之所以爲秦也而奚以慕哉璽而必慕夫秦是有童心也况王者之代興亦各有道矣改物色定制度以新當世之耳目一天下之心志夫進漢於秦則絕秦於漢宜也今而秦之社已屋墓已夷宮室已焚是璽雖存直亡國之餘耳惟當藏而不御以示勸戒而奚足尙哉且圖籙告終寶器載遷璽而歸漢焉漢璽也歸晉焉晉璽也歷世雖頻而係秦不改者何秦之重於後世如此耶甚哉秦璽之不足貴也吾非不知卞氏之璧天下之至珍李斯之篆古今之名筆然荆山旣剖之後後世未嘗

無玉東門一嘆之後後世未嘗無書璽何必於秦哉且其文曰受命於天既壽永昌矣夫陽翟之奸非天也沙丘之諱非壽也望夷軹道之及不可以言永且昌也璽何必於秦哉甚哉秦璽之不足貴而人之不深思也彼烹滅諸侯者非此璽耶壞井田而變封建者非此璽耶燔六經百家語者非此璽耶殺扶蘇立胡亥以召天下之兵者非此璽耶璽乎璽乎何爲厲之深也然徒使王莽以之迫元后赤眉以之除更始孫袁爭之而拘奪劉石攘之而僭暴六朝五季之際抑又可歎焉誠所謂亡國不祥之物者其流毒豈不遠哉故後之君子盖有笑泗水之鼎顧嶧山之刻而唾焉者至於此璽則可悼也亦可吊也而奚以寶爲抑不思帝王傳國自有當寶者而不係乎此也故精一執中二帝傳國之寶也建中建極三王傳國之寶也其守之也恒其用之也信其揆之也若合符節其行之也萬世蒙其利以是而寶焉爲璽豈不大哉而何自漢以下談者必曰秦

云秦云愚未嘗不撫書三歎投卷而笑千載也雖然世之襲秦舊者豈特一璽哉郡縣猶秦阡陌猶秦稱號忌諱猶秦然此特其迹耳至於首功好殺秦俗也尊君蔑臣秦儀也妖言腹誅秦律也則並其意而用之秦亦何嘗亡於後世也哉故爲天下者不使秦斬然不見於世不足以復三代欲復三代之治者必使秦斬然不見於世嗚呼其必在豪傑之士也乎其必在豪傑之士也乎

表

擬宋賜輔臣同賞花釣魚賦詩謝表

某年月日恭遇駕幸後苑命臣等得同賞花釣魚賦詩者聖藻敷春共覩天文之麗宸遊布惠難名帝澤之深開先已對於化工在隱悉登乎睿賞仰拂仁風光生品彙俯驚雅唱恩洽同流臣等誠惶誠恐稽首頓首竊以鳳苑迎陽宜暢樞機之暇鰲津應候爰厪湖海之思占時遠紀乎堯階偕樂久傳乎周沼遐想

英規有華疇繼眷言浪迹不物奚觀何期幸際乎芳辰况復獲霑乎餘潤茲盖  
伏遇 ○○○○ 惟馨茂德於變徵神學植外章道腴中味普滋生於湛露  
息吞噉於狂瀾寸長罔棄咸歸採掇之中四極雖賒不出惠鮮之外自葉而根  
滲漉遍土膏之厚出潛而躍飛騰頌雷雨之均屬當錦綉之辰更植絲綸之隙  
星回禁籞日近芳磯彤霞映輦照彩仗於瓊枝玉溜鳴鑾引文竿於翠荇萬藟  
爭榮無待句芒之令群靈畢至同趨河伯之朝遊觀不遠於郊圻薦獻祇緣乎  
寢廟嶰峪飛聲旋奏鳴和之律洞庭驤首欣聞張樂之歌絢五色於天葩眇九  
成之水調蘭秀菊芳陋彼潢汾之曲鵬搏鯤運化滋治世之音臣等小草愧乎  
出山涸轍欣於得水幸遷鸞樹叨陟鯨雲上林欲賦殊非夢筆之才下澤雖逢  
豈有鈞璜之手顧羽葆之斯瞻方承瑞彩忽龍章之在捧又沐恩波敢云增國  
之華但起臨淵之羨傾有赤心竊附如蘭之臭勞非賴尾敬陳在藻之章伏願

政先敦本運九土於折枝志切懲貪憫群生之麗網嘉實登盤用人無以下體  
和羹在鼎治國如烹小鮮則本支百世長流主鬯之光綱紀四方自致維旗之  
兆桃李同升喜山林之盡拔鯨鯢載屏期淳澥之常清臣等無任瞻天仰聖激  
切屏營之至謹奉表稱謝以聞

擬唐汴州刺史倪若水諫採捕江南鷓鴣鵲鷓等水鳥表

奎試

天誦如此

伏以仁主推恩自篤江湖之遠明王慎德不崇苑囿之觀羽毛咸遂夫生成耳  
目靡留於玩好畎勤勞唯恐傷民之力山林長養益弘與物之公逮叔世之  
既微肆童心之益盛澤候川虞務盡丘樊之利山豈水貢徒驚驛路之塵終期  
一雪乎此風何幸得瞻乎今日茲蓋伏遇 ○○○○ 鴻圖馭世燕翼貽謀

祥感儀韶惠孚祝網蚤扶搖於巨郡遂變化於名藩排雲一擊邁雄節於春宮  
夾日高飛正牝辰於閏位爰登鶴禁彌戒禽荒屬茲九月之清聊悅萬幾之暇

眷水鳥之珍奇繁茲澤國勤校人之探捕詔自巖廊夫鶴鶴在文王之囿何損  
鴻名踴踴集虞帝之廷更爲嘉瑞既承睿賞敢逆明綸但以鸞章遐布於徧州  
鷄陛實遙於萬里恐使者憑藉天威或緣之而生事官司奉承上意或假此以  
擾民非惟損物命於虞羅實且失人心於督課况復飲啄愆期難於將護寒暄  
異候易至摧傷徵辦者苦於誅求轉送者危於守視將毆耕種之民聚於掩襲  
益扇貪殘之輩害悉飛潛朝廷雖出於偶然郡國必沿爲永例哀此下民恐增  
多口貢之內苑何益纖毫諒於帝德無裨知非聖心所急臣是以捧御札而三  
嘆對玉人而再思津還使臣封上成命誠爲不知大體仰希俯鑒下誠寧願使  
小臣獲罪受不恭違詔之誅豈可令元后蒙誣來從欲勞人之謗更願廣德心  
於宏大慎凡動於幾微謹茲羽節之馳永謝皮冠之役則薄海承風知聖人之  
不貴遠物朝端動色賀天下之當見太平豈唯賦陋乎上林行見祥呈乎阿閣



臣無任瞻天仰聖激切屏營之至謹奉表隨使以聞

贊

太公贊

玉璜釣磻金鈐授洛韜啟神機書傳聖學烏乎君獵得臣臣漁得君八百開周  
三千定殷漁耶獵耶

郡公松山孫公遺愛錄畫像贊

士曰我師民曰我父清風穆如尙友千古

雜著

廣壽

嘉靖甲寅朱夏仲月纖阿旣望耀靈再閱陰陽辨而欲寧天地交而成節乃有  
僊翁號東園公初晉七袞言開曼齡是日高宴衣纓景從遠邇馳賀輳於江東

會有京華旅遊淮海浪士聞之歡喜欲論所自見金陵丈人而告曰子知翁之壽乎盛哉晉哉未有涯涘吾有所聞什得三四言祈折衷敬質於子丈人曰唯唯客曰昔高皇帝之平寰海也提三尺驅群雄而中山武寧實維元功是故饗配清廟國封大名世紹貂玉門羅鼎鍾奕葉融結雲霞蔚興觀靈奇之孕積固非崇高名寵之所專承也爰有異人麟祥鳳靈德表金瑞仁徵木精亮公侯之復始又外勢而遺榮卽華源之委會宜壽域之恢弘者乎丈人曰天昌慶善之家道與神明之胄度朔培根枝柯亦壽然不止於是也客曰禹益標山欽元記水子年方朔後益奇詭謂僊聖之玄超多含靈於地紀而况乎表裏神州東南都會江介勾吳之首地脉良常之肺覽象闕於簾楹納鳳臺於杖几列第周環雙園對起故凡桂檝尊疊華舟騎吹欲爲建業之遊先問大功之里偉清時之舊德與山水而同美又何羨乎蘄潭檻井引齡延歲優游樂土吾逆知其壽

矣丈人曰呂覽雲氣周官土風所受斯異長年可徵然不止於是也客曰蓋聞之四時之實口成頤百度之奉身爲饗精神溢於弘受氣體移於居養先生邑食上腴第蒙中賞施外衢之行馬分內廷之甲帳庖羞則海秘山珍居處則冬溫夏爽玉牒金題紫標黃榜紛朱衣而馬走羅形筆於鷄幌伎樂梨園之部賓客蘭亭之黨固宜其氣協而昌神怡以王百齡千二結紫氣而佇玄想也丈人曰逍遙得乎天游悅豫暢諸人理惟適焉而各適亦有助於靈紀然不止於是也客曰萬有生勞觀生可葆六鑿心飛攝心爲要唯長提乎四印亦皈依乎三寶吾聞我翁悟幾獨早藏真住幻識晦遺皎雖隨喜於諸緣粵社塵於衆惱布金鷲嶺之園洗鉢牛山之廟居士則維摩著字長者有給孤稱號是以壽者無量法身難老梵天長在慧景恒照須彌比固固無得而魔嬈矣丈人曰廣大諸天妙境會焉結堅完於清淨亮有德於真銓然不止於是也客曰吾嘗登公之

門矣竊知其家蓋鸞鷲之丹穴而飛黃之渥洼是故挺珠樹之三秀粲連枝而並華伯也繩武于城爪牙周廬環衛雲屯不譁仲季競爽文心吐葩摩磨月而將矯起龍雷而欲遐是皆稟內訓謝外夸習陋紈綺風同棗麻接周公之橋梓哂張氏之梨櫨本德則溫恭載淑承顏則和樂且嘉盛洵美而其順誠有宜於壽耶丈人曰豐慶于前其光乃傳人道之祥靈長可占是則然矣然猶有本焉請子揆其元客曰於哉允哉公之必壽我知之矣夫公所荷者祿也而人不知其承之以穀所綏者福也而不知其將之以德故事嚴君則孝而篤教家庭則端而肅御群下則慈而莊處姻親則和而穆設享會則勤而有禮交神明則敬而不瀆待賓客則韋布等於簪紳樂山林則軒裳寄於樵牧故居無異食者魏公子之賓待而舉火者晏大夫之族是皆行己之上篇平生之真籙若夫妙矣難知擾之可測澹乎若水淵兮似谷又先生之所獨得也是以神理懸符天心

遠屬不益之以所有餘而投之以所深欲受玄祺開壽域猶膏雨之必濡而有  
年之恒穫又安用試華佗之禽戲訪季主之龜卜君子以爲何如哉丈人聞言  
犁然心服升階再酌舉以進客振衣應節吟丹鳳而舞黃鵠也

序伎贈寫真李山人

通州李子北遊於淮陰館於蔣氏李子素善貌人其留於淮也縉紳國人咸求  
之貌其貌人也十嘗得十或者問曰子之於伎也習矣乎子而貌人十嘗得十  
何也李子嘻曰余非伎人也而游於伎余非習於伎也而與伎偶始余挾策讀  
書出游於都邑羸然與人群見夫老少者異狀肥瘠者異質黔皙者異色長短  
者異形妍醜者異姿余嗒然而神怡春然而心融少焉觸然而警中是故余志  
其形體余志其耳目口鼻余志其鬚眉余志其頷頤余志其權余志其輔旣而  
和墨配色濡筆焉而加之素恍然若覩斯人焉故余貌之人也十而失五六者

鮮矣久之余益與人習也於是舍其格遺其形求之於俯仰求之於瞻眺求之於笑貌求之於態求之於情吾心或若戚然其有謀犁然其有酬於是和墨配色濡筆焉而加之素若與斯人笑語警欬徘徊焉故余之貌人也十而失三四者鮮矣今余貌人多矣余不能爲心矣余忘余伎矣有求余貌者余不知其貌若是耶態若是耶但余隱几而坐忽焉若覲斯人於素又忽焉若見斯人矜色而待余又忽焉若見紫氣於斯人眉宇之間於是余急起而圖之又不知孰使余起耶孰使余圖之耶孰使余肖耶孰使余不肖耶故余之貌人也不知十而得一耶十而失其九耶十而得十耶十而不失其一耶余又安知伎於是淮南吳生聞之嘆曰善哉伎可以語學矣彼君子始而張弓旣而雲行水止而天游焉天下乎疇靳之哉熙熙神應之矣是謂凝化

我聞南瞻部洲七十二福地有一福地名鉢池山於此山中有一梵宮名景會  
禪寺此寺在昔整齊堅完四衆瞻依盛作佛事歲月既久轉爲荒蕪日荒月蕪  
遂大凋敝有二比丘惠曉秋月感動悲怖合掌誓言我今粉身不足報佛何況  
一切外身浮財願分檀施減損身口冀有餘美興起此寺作是念已願力所至  
各有萬錢遂持此錢買辦諸用復又念言我今所捨有如毫毛欲成弘因須假  
衆力但願大衆皆如我心有一居士好爲言詞聞之欣喜乃復讚歎讚歎不已  
而說偈曰

世尊在西天

名曰極樂界

種種供養具

雜寶爲莊嚴

我今供養佛

綵繪莊嚴之

但於有佛處

卽是西天竺

淮安顯名地

無如鉢池山

景會古招提

頽落今可歎

狐狸穴敗屋

蝙蝠鑽空梁

僧衆無安居

何以供養佛

慈悲二禪衲

稽首告十方

告汝在家僧

告汝現世佛

願汝發喜捨

積少而爲多

捨汝所有餘

凡此所當用

磚灰瓦石木

糧食并銀錢

捨汝所有餘

償汝所不足

富貴多男子

安樂壽命長

隨汝之所求

委曲方便報

若肯大喜捨

全無吝慳心

是人所證受

福報真希有

願隨汝力量

而興成就心

汝若興此心

一錢亦成就

吾今告檀越

論汝爲人家

天明下床來

事事要錢用

雖非浪花費



過手歸虛空

向佛少結緣

萬代不磨滅

何況浪花費

猶之雪填河

身勞心不安

將錢買罪業

移來向佛捨

福積罪業銷

諸佛爲證盟

了了不差錯

昔有童子戲

壘瓦成浮屠

善根之所成

後得無上果

何況捨錢帛

眞實修佛廟

猶如種五穀

照種而收成

自佛行中國

于今數千年

若有半米錯

一刻行不去

吾今告大衆

願汝信不疑

因信生喜歡

千界皆歡喜

誌銘

通議大夫都察院右副都御史潘公神道碑

嘉靖戊子都察院右副都御史熙臺潘公奉命巡撫河南土明年致其事而歸歸三十有四年而卒卒之三歲其孫蔓請于朝得賜祭葬以甲子冬十二月十六日成事先事之三月蔓謀碑神道而以文屬承恩夫舍崇顯而鄙是圖豈習見公由來過與之意且謂今之知公者莫小子最乎又何辭按公諱墳字伯和熙臺其自號也不詳家世始起元有諱思誠者官淮安路醫學教授遂家山陽曾祖諒仍世業醫祖亨始爲儒仕終同知武昌府父壽鄉里善士公生有異稟工文章精究問學在龔序卽爲當路所知正德丁卯舉於鄉戊辰登進士第明年選授工科給事中尋改試職甲戌陞吏科右給事中明年陞工科左給事中又明年陞都給事掌兵科未幾傳奉特旨陞一級外任授開州同知首尾職諫八年矢志盡職初入諫省值劉瑾盜政後言路窒塞公首疏除蠹飭武勵憲司正朝廷四事以開言端乾清宮災詔求言公又疏開聰明決聽納以回上天意

者俱見采上親郊祀慶成公又因事納忠力勸親政當以處仁遷義爲法左右  
忌其切謂太甲事非所宜言摘以動上上怒勅署公名御屏後竟直之宥焉舊  
制漕運都御史兼撫江北地方歲與總兵叅將入議漕事辛未歲流賊訐內郡  
憑淮覘濠公念祖宗陵寢重地撫臣不可一日離請留之以總叅入奏可後沿  
以爲常其所論建多根本機要政治大體他瑣細不及詳也彈擊之鉅者則以  
掌院王都御史鼎曲庇輔臣子劾之王罷會勘甯都御史杲諸不法事劾之甯  
雖逸於刑後十年終敗流賊之熾劾總制陸兵侍完失律陸感激遂成功在兵  
科封駁尤衆每與大司馬晉溪王公瓊會議引誼據法折之不少撓當是時潘  
給事之名重大廷方逆瑾橫張欲牢籠朝士之有聲望者意頗屬公公不應後  
江彬朱寧繼瑾以恩倖橫彬嘗冒功級公按實叅彬毛倫者寧黨也公力參其  
冒襲皆積有嫌恨三凶值一立可糜碎幸而全脫人謂公有天助焉然與貴權

抵牾知不安於內矣開州之授不以貶而陞者杜其復起用也公之蒞開也人以遷客待之公不以自待均賦稅清訟牒移民以實州城督察賑濟三年三乞休天官判留出異等庚辰陞南京太僕寺寺丞盡革馬政叢弊明年今上登極詔起廢官及守正遭陞改者復都給事中陞陝西右叅政督修武宗皇帝實錄監造版圖逐貪汙興水利決定疑獄總制三邊邃菴楊公一清異之薦堪撫寧夏吏部推陞江西廉使俱未果用乙酉陞山東右布政位益晉治蹟益弘居山東二年陞浙江左布政浙江旬浹即拜河南之命時河南饑隣道青羊山賊阻險公是陞以臺薦廷推至至則經畫荒政既詳因奉勦撫兼行中旨會諸路討諸路多觀望獨河南兵先入奮擊賊平勅使上其功第一賊之未平也廟堂意主撫公以兼勦樹勛拂廟堂意言者瞰之論公誤賑遂以致仕歸歸後三日始叙青羊之賞獲賜銀幣公既退處乃買田平河橋以農自業別號平田野老會

少司徒南津胡公璉亦家居公平生交也聯廬接畝尙羊嘯咏相與陶陶焉公  
在田終其身累薦不起與當世疎闊然未嘗有遺世意每於時事聞見輒蹙然  
長嘯一遇民艱卽躬詣公府白之不遜不嫌也故居鄉有平虜議平海寇議錢  
議河防議以至弭盜息民安貧保富皆鑿鑿不爲空言者平生尤重風教在家  
仕外其創立標舉如正名宦鄉賢二祀表景張二公遺忠建范文正祠闢文節  
書院祠張趙二賢作昭卹院守視楊尙書塚皆崇典也又起松雲樓以望親搆  
履心亭以展墓立統宗譜以合族晚年特哀郡之名懿上下數千載者爲文獻  
志以傳公生於成化丙申十月六日卒之日爲嘉靖壬戌六月八日得年八十  
有七公考以公貴贈工科給事中妣毛氏贈孺人繼吳氏封太孺人娶馬氏封  
孺人繼娶章氏子二長沐馬孺人出次采錢出也俱郡學生俱有雅譽俱蚤卒  
女七彩鸞聘陸道蚤卒彩鳳適朱瀧馬出彩馭適田奕采蘋適胡効詮錢出采

藻適楊憶昆采繁適盧守恭采芝適張東璧章出道瀧奕國子生効詮守恭東  
璧郡學生効詮南津公少子也孫三長國子生即蔓其二俱郡學生曰蕃曰苞  
曾孫二俱幼公有疏議詩文集數十卷藏於家葬在平河新壠其自爲生誌所  
謂樂丘者也烏乎自少至老特立一身可進可退可險可夷可譽可毀而不可  
一毫挫折者氣也公真異稟也哉銘曰 世變而趨以圓爲妙我守吾方衆嘻  
其笑於惟熙老合矩自然不破其觚翼翼折旋由學而庠而官而隱古道拳拳  
介焉畦畛濤鯨峒虎我掣我櫻冥彼危機矧爾俗情止水斯澄精金在鍊百怪  
形潛疇歟敢眩安言卑視談塵余揚有激綱常須眉磔昂前輩所遺風範議論  
言約於家鄉之謨訓平莊課穡縮用劬耕有備無荒享屢歲豐稚疚而尪健於  
耄老雙鳳先傷三雛後矯畸於人者實契於天種種初心終收萬全豫卜歸藏  
新膺寵命言答前勞爰開末慶昭徽述思匪侈吾邦不佞予言用式四方

封通議大夫太常寺卿兼翰林院侍讀學士雙松丁公墓誌銘

代作

嘉靖己未余舉進士京師獲拜后溪丁先生旅次蓋深有仰服焉未幾叨一第官禁林從先生益稔因得通其家世於是喟然而嘆知風德之有源委也蓋丁氏之盛自先生發之而其尊人雙松翁之積累真有不可誣者云翁諱儒字希賢世爲淮郡清河著姓父諱鳳誥贈通議大夫太常寺卿兼翰林院侍讀學士母章氏贈淑人配仲氏贈如母號皆以孫子顯貴翁少而孤性不喜戲弄顧獨喜讀書請於母欲就鄉學章淑人憐其單弱弗之從也既遠志不遂遂俛而治生其治生也朝夕無怠心常以家敝爲憂有撐持奮起之志丁故舊族業雖落而役存凡遇徵賦族人皆避匿翁獨身當之直氣正辭訴於官官爲之免役由是以幹濟稱前客安東徙盱眙澗溪以道生財家復振年三十餘始生后溪后溪公既穎異翁復勤訓之擇師授經皇皇無弗至用是掇天下大魁雖異人挺

拔而鄉邦根極之論皆曰本親教也平生與人無競心雖遇卑凡亦必先之禮讓尤極孝愛曾遇母誕日奉酒具爲歡有鶴飛來自天回翔不肯去人又以爲孝所感云晚因倭變遷郡城治第一區備花竹池亭之勝庭有雙松因取以自號攜幼子士良讀誦於中陶陶然樂也最喜吟咏惡落前人科白故其所賦有悠然自得之趣人多傳誦之自后溪先生仕於朝抱違親之感懇迎翁翁不肯赴韜光鄉社與韋布同子在館閣縮內制司中銓去八座三台不能以寸而翁亦膺封爵登寺院班大夫階矣顧乃雙扉畫闔旁無隸童越國而問者驟不得其門左右里隣多不識其面者手札絕往來之儀肩輿杜出入之跡顧肯無故干公庭哉翁雅號繕性萬曆三年六月偶示疾至二十二日戌時終於正寢后溪公聞訃馳至亦以憂傷致疾閱再歲卒於家首尾三禮兩世踵亡天乎不其傷哉翁生於弘治三年九月二十七日享年八十有六生子二長即后溪公士



美仕吏部左侍郎娶周氏周卒繼以李俱贈淑人李卒繼以楊咸有令譽次即  
士良太學生貳室朱出也娶張氏女一適本邑學生王楠孫男二有殷聘張氏  
有周聘胡氏女孫四長適本邑廩生王家極其三尙幼許聘閩世傑潘嗣袞蕭  
文鸞俱名家子也方后溪之病亟深以不躬襄翁大事爲憾故一切喪紀俱豫  
授於士良且以翁埋銘於某託今年萬曆丁丑士良將以十二月十五日奉翁  
柩舉 諭葬於城東三里塘新阡與仲淑人合嗚呼世誼是通言念存沒顧可  
無辭乎爲之銘曰

楚服雄盤淮泗貫流清口咽襟爲楚上游宛被坤靈含祥啓秘生我后溪爲昭  
盛世人云夫子天寶特生我識其家由於德翁鬱鬱雙松德翁維肖手剖璠璣  
獻於清廟子裁子製五色天衣曰經曰緯出父杼機敦篤清真後先一道百世  
方來爰徵家教我瞻新隴有氣如雲弘初復如待彼後昆

贈翰林院脩撰儒林郎沈公合葬墓志銘

嘉靖甲寅十洲沈先生以宮諭掌南翰院未幾卽拜祭酒南雍十洲之南也奉母太安人于氏于官丙辰八月十有五日本安人卒于官所於是祭酒復奉母柩還葬淮陰十月二十一日啓其尊人贈修撰卓亭公之兆而祔焉將事之月祭酒嚮其友吳承恩泣曰天乎坤喪吾父三十年慙焉未銘于墓坤何心焉今坤母又棄我天乎坤復何心哉非子孰宜爲我二親辭者昔承恩與祭酒俱童稚同試生儒郡縣一見相欽異定交數百人中因互拜其父母時卓亭公愛十洲甚肆之家謝諸閑往來者唯承恩至公輒喜屣履延迓與對談今古灑灑無倦出嘉羞珍果啖之公一日命承恩飲坐祭酒其旁酒半視之笑因呼謂承恩曰吳君此我不凡子也狀元邪卿相邪顧見十洲有嫌客色則又大笑曰狀元邪卿相邪汝何嫌讀書不爾非夫也斥巾舉白意氣揮霍目光射爛爛然公自

少事賈其賈也顧無賈態賈情屢賈于吳與衆賈異趣坐是多不利卽有利亦必盡市圖書古玩不急之物以歸鄉人同事者竊笑之然遇人有急能渴赴有爭力伐不平者有爲不善苦勸戒人亦以此多公公家世敦睦至公父處士公彌篤公益修之處士公歿公獨從母與從父兄嫂同居事之謹纖悉必告銖絜無私藏公固天性加以于太安人贊佐愈和嘉靖丁亥春公病至九月三日遂卒臨卒時不亂唯以遺母爲悲卒後五年十洲舉于鄉又十年大魁天下人咸嗟公弗及見而綢繆種樹識者知其有今日云自公締造厥家公歿而家中替于太安人感焉心倍勞上奉君姑次叶姒婦內秉教訓外聯合族姻擔撫補苴茹納殷憂有人不能堪者及專總家政更拳拳焉辛勤二紀之間而宗門遂大故雖由約入豐階華于簡素而服劬處澹猶在舊家時也方狀元之登第報飛至蓋吾淮古未曾有通國震動太安人承之色無變但懷往心傷甲辰秋狀元

公修撰翰林書三歲考得贈父如已官封母得如今號其內子亦得偕封拜慶于堂子姓環列銀緋珠帔輝映巾卷至是太安人始融然歎曰吾乃今幸免咎先姑矣兒孫輩其念諸余曩聞之淮北有子翁者與其媪俱善相人太安人父母也太安人年笄矣尙偃蹇未字翁媪者不爲意翁偶行道上值卓亭公大驚默曰此奇人眞吾壻也配吾女當生貴子歸而語諸媪女焉爲望斯邦兆之矣不亦異哉公之先來自崑山隸戎于大河公父處士公諱蕙字廷噐公母范氏公之諱曰煒字曰文盛卓亭者別號也公生于成化壬寅八月十日得年四十六歲太安人生于成化辛丑十一月十有五日得年七十六歲生子男二祭酒坤爲長娶趙氏封安人次坊郡學生娶宋氏女二長德容適刑科張都給事中侃次德眞適太學生陸鈞孫男二兆車娶馬氏兆年娶朱氏俱郡學生兆安聘葉氏女孫三一適邑學生周學禮其二許聘蔡直臣張樺曾孫男三淞庚聘陸

氏浚甲聘金氏浚辛聘張氏當祭酒請銘承恩承恩私自念彼我既羈貫友通  
家我亡子鳳毛祭酒又嘗許昏以女其先太父母我又嘗銘之矣揆諸誼得無  
辭乎銘曰魁國士撰國史造國子人云有子如此予曰親之似予曰親之自塘  
七里只二老寧止永代茲始言鬯而社

先府君墓誌銘

嗚乎孤小子承恩不惠於天天降嚴罰乃奪予父然又平時不學問不自奮庸  
使予父奄然沒於布衣天乎痛何言哉天乎痛何言哉烏乎有父生不能養今  
沒矣孤小子又何忍懷世俗之情嫌不執筆俾先美曠隊不昭於世焉烏乎孤  
小子又何敢陵駕潤色不模放事實使后世覽予文辭者悶然不信予父於是  
頓首系述曰先君諱銳字廷噐先世漣水人然不知何時徙山陽遭家窮孤失  
譜牒故三世以上莫能詳也曾祖諱鼎祖諱銘餘姚訓導皇考諱貞仁和教諭

兩世相繼爲學官皆不顯方仁和君教諭仁和時先君四歲矣仁和君梁夫人則挈之如仁和數月仁和君喪則又挈之歸山陽家世儒者無資且顛沛宦遊歸益貧是時先公已有性資不妄啼哭笑言但時時向梁夫人索書讀以貧故踰數歲始遣就社學先生社中諸學生率歲時節朔持錢物獻社學先生吳氏不能也社學先生則勤勤教諸學生書不教先君書先君輒從旁聽窺盡得諸學生所業者於是通小學論語孝經矣社學先生反以爲奇欲遣就鄉學梁夫人聞之嘆曰嗟乎吳氏修文二世矣若此耳斯孤弱奈何於是泣先公亦泣弱冠昏於徐氏徐氏世賣采縷文穀先君遂襲徐氏業坐肆中時賣采縷文穀者肆相比率酒食遨熙先公則不酒食遨熙時衆率尙便利機械善俯仰者先公則木訥遲鈍循循然人嘗以詐不之解反大以爲誠侮之不應亦不怒其賈也輒不屑屑然且不貳價又日日讀古人書於是一市中閎然以爲癡也里中有

賦役當出錢公率先貫錢待胥胥至曰女錢當倍則倍當再倍則再倍曰女當  
倍人之庸則倍人之庸人或勸之訟理曰吾室中孰非官者然又胥怒吾豈敢  
怒胥又犯官哉於是衆人益癡之承恩記憶少小時入市中市中人指曰是癡  
人家兒承恩歸恚啼不食飲公知之嘆曰兒翁誠癡兒免爲癡翁兒乎及承恩  
冠矣先君且年老見舊時易侮先君者盡改節爲敬恭里中有爭鬪較量競趨  
先公求平面折之亦欣欣去或曾懷有隱匿難人知者即不難公知且訴以臆  
鄉里無賴兒相聚爲不善卒遇公一時散去皇皇赤發面也承恩於是喜從容  
言曰此殆癡效與先君方食投箸起曰兒以我爲夷外鉤中攫人情乎愀然不  
悅也承恩益慚愧恐懼失言焉先公嘗自言百不及人但未嘗有機心故形神  
不勞衣食稍溫飽止矣不顧慮有無唯日飲酒然不取醉三爵后便頽然嘯歌  
遇好風日即徐徐負手去遍歷近郊古寺中或大林下俯仰徘徊焉蓋終其身

未嘗入州府郡大守卮山公聞之以爲賢鄉飲召爲賓不至三命然后赴然頻  
頻自謂不敢當也性一無所好獨愛玩群籍不問寒暑雨暘日把一編坐戶內  
大官過亦不知前騶呵之乃徐起自六經諸子百家莫不流覽獨尙書左丘明  
春秋未嘗一日置也於諸書訓詁聲切不甚通悉然獨得大旨要歸焉居嘗逡  
逡口不能道辭及與人譚說史傳上下數千載能竟日不休每讀書至屈平見  
放五大夫鴟夷諸葛孔明出師不竟周子隱戰沒檀公被收岳鄂武穆死詔獄  
未嘗不雙雙流淚也又好譚時政意有所不平輒撫几憤惋意氣鬱鬱云晚年  
特愛菊自號菊翁然又不種菊生來鮮疾病一日買船泛城西太澤中意欣欣  
出門去矣歸即不起蓋嘉靖十一年三月十九日也天乎痛何言哉天乎痛何  
言哉距生時爲天順五年七月二十一日壽蓋七十二云以是歲十二月二十  
九日葬灌溝先壟公壯歲時置側室張實生承恩娶葉氏徐夫人生一女承嘉



適同郡沈山烏乎德音容儀昭昭在也然則吾先君何往也乎銘曰 烏乎蒼  
者天平黃者泉乎吾父於此潛乎

誄

鶴江先生誄

嘉靖庚子秋月日贈禮部尚書鶴江蔡公卒于時天子興當宁之哀群公申同  
朝之慟士林起望門之慕國人鍾罷市之恫傷賢感德遍于朝野焉皇帝於是  
垂始終之恩諭賜祭葬休光異數叢集故園禮也惟公學爲人師才茂時用德  
標世範道衍國經而台輔未登鄉人士君子猶以爲所受未剗然以布衣登甲  
科官禁近終踐臺省清華之名遍滿四海逮其亡也龍章在門鸞儀次野百餘  
年來一人而已衆又以董薛易文中之名延年表靖節之德况公炳耀朝著啓  
發此邦不可無述而猥以命僕僕竊自念昔受公知昉於童孺登龍識李即以

斯文見賞有懷雅遇二紀於茲既夙承殊盼而今又蒙群請則素旂所著抑又何辭於是再拜秉筆奮而爲誄其文曰 淮海盤回雄開楚服篤生名哲耀靈

茲域於赫尙書應運乘期六翮培風糾繞紫霓振秀離倫粵由羈州六學九流珠也在貫瑤珂翠薦錦芾綉裳執轡魚魚翱翔大方江介爰征遂魁南省千人自廢一舉脫穎再戰再捷得雋禮闈天極八重矯翰奮飛英英五雲集于丹陛萬言如水觀我大對甲榜天開金題綉標拜舞于庭和舜九韶文海木天群僊予伍退食從容闔風玄圃形闈載筆國紀是司左氏博雅南史直詞講幄焚香寶筵龍象會文切理亦條亦暢載承新命吞雲言窺故曰南遷咫尺不違中道贈環編摩東壁寶圖大訓唯我黼黻登賢進士文柄五操勞矣披沙譬彼拔茅唐有敬輿宋惟六一衡鑑誠懸歐蘇輩出給綸掌制帝曰予勤載晉春卿仍官禁林粵建青宮承華闈館博簡元僚遂膺妙選星輶繼轉言邁中都楚獄覃恩

漢庭執符九域聞風三台虛席誰云木稼永卽玄室嗚呼哀哉靈車千里言邁  
山丘日月長垂皇恩若流瞻彼岡原有碑有宇光儀斯赫載彼草樹千秋一淚  
眇矣音徽淵龍永戢遼鶴長歸烏乎哀哉山川日月實麗人文公文炳煥大雅  
不群有國有家德焉是保維公明德奕世永寶諒爲君子展也清臣允德允文  
詒其子孫烏乎哀哉

祭告文

祭章聖皇太后梓宮文

代鶴江公作

恭惟聖母明德配聖慈仁祚邦誕我元后母茲萬方身歸于天功留社稷山陵  
告期梓宮南適龍旂鳳舸先帝是從二聖永安皇心載寧漢水襄江萬年王氣  
體合乾坤慶流天地臣恭承王命南國慙留拜伏征途攀送末由明水瓣香齋  
心雪涕精白告虔下臣之義尙饗

告先師廟文

代作

伏自唐宋以來先師之宮皆有像設陋而不典瀆玩非經匪所以妥明靈昭崇景也皇帝神聖志復古先凡天下祠祀不如禮者悉正之况教道宗主四海永依其容以忽於是下詔郡國命撤塑像奉安新主我守臣茲用從事烏乎聖賢之靈如日行天如水行地光明潤澤元氣所會陟降庭止瞻之在前豈係此土木也哉或者愚民俗士耳目所駭而在天之靈庶其安矣斯文不墜吾道益尊萬世永嚴自今日始謹告

淮安府西儀門并西廡上梁文

變災爲福天旋永泰之機革故鼎新地啟長寧之兆昨偶緣夫小警今大復乎宏規卜筮協茲嘉辰工師奏其長技漢武有舊圖建章繼柏梁之後春申留勝蹟黃堂開石室之先右門洞達會一方政教之宗西廡肅清護百載曹司之藉

爰申六唱用佐群工

拋梁東雲起蓬萊一朵紅齊魯遙連千里路明年棠樹領春風

拋梁西望裏湖雲水泊堤山映夕陽多爽氣訟庭拄笏覓詩題

拋梁南門啓迎薰瑞氣還福德一星離粵嶺文光先楚射州山

拋梁北遙指神京雲五色錦纜牙檣日下來黃河長繞千年國

拋梁上彩虹飛起三千丈咫尺丹霄雨露垂風雲喜氣瞻天象

拋梁下仁風四境隨車駕和氣潛從地底回冰霜先向春前化

伏願上梁之後五行各順百度咸和十一國黎元歌舞猶水之歸千萬間廣廈

嵒嶼如山不動九級高遷坐待重玄之慶兩岐載咏允孚三白之祥

祭卮山先生文

痛嗟哉卮山先生痛嗟哉卮山先生公真長逝耶非耶前者之夕有人傳云公

病而得請矣僕始以爲疑俄又傳云公歸矣次方家壩矣聞之失喜晨興疾趨  
及公之舟則見靈車遷於沙次矣丹旒翩於零雨矣兵隸倉皇而買舟家人灑  
泣而相告曰公逝矣痛嗟乎天乎有是哉是邪非邪見聞旣真神悸心惑驚惶  
號頓五內震摧心氣少定細問疾狀則云公卒于痞嘻公舊時未聞病此也乃  
以此歿耶憶昔在吾淮燁如遊龍振如鳴鶴戴星聽政中夜而即安燭照刀斬  
精神奮揚知者皆以爲福祿壽考之徵而今則齋志百年斂形一木劍履不御  
風淒縹帷傷哉傷哉擅天之才邁俗之氣竟何往耶竟何往邪淮方之民懷公  
之德罷市而哭鬻衣而奠而况吾徒承色笑之教蒙國士之遇者又何以爲心  
耶痛嗟哉卮山先生痛嗟哉卮山先生昔人有言感恩易爾知已實難承恩淮  
海之豎儒也迂疎漫浪不比數於時人而公顧辱知之泥塗困窮笑罵沓至而  
公之信僕甚于僕之自信也公今逝矣誰當念予虛浮無實之文海內固亦有

獎之者而玄黃之外孰能了僕之心也哉嗟哉卮山公今不可作矣此生無相  
見之期矣獨念去歲之秋公聞晉陽之擢解鎮南省旌麾渡淮未幾復道揚如  
晉公之道淮也僕方滯於外公之道揚也僕適病於家前不得拜公於門後不  
得從公於遠過承遣使錫以教言會晤參差爾時不以爲恨意以爲他日可酬  
豈知遂爲永別耶嗟哉卮山公今歸矣明靈不昧言返故鄉德在淮民功在朝  
廷名聲在四方剛大之氣昭爲列星激爲雄風豈復泯沒獨念彼天不吊奪我  
父師我傷如何我傷如何嗟哉卮山今與公辭矣碌碌人中塵土如舊我實負  
公其又何言自今以往亦願努力自飭以求無忝于我公知人之明庶他日少  
有所樹立亦卮山公門下士也持此以報公而已烏乎汴州從事敢負董公向  
來瓣香敬爲南豐樂父激西臺之悲山丘掩羊曇之淚遐思古人亦同我情愚  
復何心哉愚復何心哉尙享

祭孫淳齋文

代作

烏乎淳齋今何往矣淵源之學經濟之才光明之心易直之性氣稟剛大量包宏深所謂福祿壽考追逐焉而不置者也而顧年不滿乎六旬位不登於三事平生所饗止於斯爾不其痛乎烏乎當公之奉簡命司文衡秉誠而南也搢紳相賀皆云必當得真材功勞未奏竟以身殉焉則是未收時英而翻喪國寶天乎亦何酷哉烏乎自<sub>其</sub>等聚官於茲從公游處襟期不隔契誼兩投退食之餘屢陪觴豆觀其笑談中的一座盡傾雋爽邁倫千人自廢燁然其猶龍也今則漂搖江表載殯還都丹旄翩翾恍焉疑夢入其闈升其堂觸類如故音容已亡聞內子之哀號覩遺孤之匍匐行道之人之所不忍也而况吾徒乎然姓名顯於科目黼黻光於禁林師範重於成均編摩著於史館穆彼清風允揚來葉沛其餘澤用裕後昆公真不朽矣復奚憾乎揮卮灑泣失聲相向慟切而不能已



者蓋<sup>某</sup>等鄉曲之情也

祭石鹿公夫人文

天生名德以佐佑乎昌時必爲之作合配賢贊外猷而紆內顧蓋理然也夫人  
閨闈毓秀山川孕靈歸我石翁儷美同志故自學校而科甲由侍從而公卿杼  
軸漸而樞機井臼晉而鍾鼎國典代被天恩日垂上宜舅姑下衍子姓人皆謂  
夫人表內儀之極盛享諸福之大全而不知三十年辛苦之功良非易易也烏  
乎暗合二南無愧風人之誦同聲兩漢有華列女之編氣志應乎神人慶澤沛  
乎邦國則天之篤夫人者豈直一家一邑之關係也哉無疆之祚魄兆允彰善  
後之圖規模完備於是乎順化而還元夫人又何憾矣僊輿南返感動舉朝在  
<sup>某</sup>等通家誼而忝鄉人者固宜倍群情也瓣香卮酒共薦精意唯明靈其鑒臨

之

祭徐太翁文

代作

蓋聞天爲國家昌景運開太平必先篤生元輔而儲祥啓秘又必有所自生然其生也雖稟乎天命而栽培教導又必有所自成是故我師存翁應期命世道佐時雍恩流庶品化暢八紘而推原其本實太翁生成之功也於昭重德抱朴含冲一官自効潔已勤躬才而不宏其用賢而不大其逢遂能以家庭之模範擴宇宙之帡幪是則上玄委曲之妙使一時之否而百世之亨也緬惟茲地宦轍曾經僊遊雖眇彌延頌聲儼衣冠之遺像崇俎豆於新宮又足徵民懷之永而士論之公矣<sup>某</sup>等欽承上命兩浙觀風允瞻先烈用吊芳蹤遡門牆之一脉極山斗之同情瓣香束素敢告明靈蓋有驗夫天人之交感家國之相通匪徒舉枌榆之常祀獻桃李之私衷已也神無不在貫徹幽明歛如風雨著比日星共遙期於陟降諒來格於精誠

張清溪馬竹泉祭吳醴泉文

代作

烏乎醴翁今何往乎某等多幸辱公周旋于今有年矣外形骸而通心腹猶骨肉也故未嘗有三日不相見而亦未嘗有一事不相關或時違隔不過旬朝而彼此皇皇真若阻天涯而綿歲紀者見而後心始快也今則相見永無期矣數日不面翻爲隔生天乎某等亦何以爲心乎旦夕以來心神罔罔如在夢中猶謂公之尙在忽時動念即欲相過盖良久而後悟也平生歡笑變爲悲傷蓋不忍經公之里而况忍登公之堂乎烏乎醴翁無可言矣世運飄忽天道有常即公之素豈卒泯沒哉故公之愛姪敬兄自任其勞而不校乎夷險接人處物一依於義而不視其盛衰待賓恤困務竭其力而不自計其有無喜質直而惡虛浮輕貨財而重文藝蓋通國之所共嘆者也持此以還元化雖萬金一品期頤之壽亦何足道哉撫膺長慟侑此一觴仰視玄穹膈臆難訴公其知之邪不知

邪

跋

熙臺先生諫垣奏議跋

愚讀是冊見先生經世之略福民之心焉然諫道備矣故歷科三歷歲五六爲  
勘覆者二爲陳情者一爲封駁者十爲獻納者十七當時豈無尋常細碎言之  
可以塞責者哉而先生上正君心中定國是下以全元元之命皆天下大慮也  
身家焉弗之顧而况于名與位乎諫乎諫乎真無負于諫矣然機宜縣斷又以  
觀識處分弘密又以觀用奪倫案杲忤彬犯寧又以觀氣危而不變焉又以觀  
節屢拂而屢進起敬起孝又以觀量模交午之狀悉幽微之情直而順婉而中  
則妙乎文辭然皆本之仁義而行之以至誠讀諸奏者知先生之所用心矣故  
我師漁石歎其有陸贄之忠諒哉然乎諒哉然乎是冊也抑齋盧大夫得于公

家而刻于浙蓋蘇子進讀宣公之奏之意表忠立憲誠不朽之令圖其布諸朝廷也則臺省之元龜金鏡而藏諸郡國亦吾鄉之寶玉大弓也歟

范寬溪山霽雪圖跋

雪一也而其景有三故天同水玄群木僵立飄瞥林岫歸漁罷樵索然而如悶者爲初雪林際深黯山形模糊橋約藩籬遮蓋滅沒渾然而如睡者爲密雪山揮豁以呈露水通融而怒流樓觀洞明原野映帶欣然而如笑者爲霽雪若但見其皓然一白即以雪景槩之失真趣矣故余觀於是卷舒未盈咫即指之曰此范寬溪山霽雪圖也圖窮視其題識果然

書茅容傳後

陶子之母隆客茅母之子簡客隆客爲子簡客爲母是故隆客易簡客難識隆客易識簡客難故非湛氏不生陶侃非茅容不致林宗

石鼎連句圖

余嘗欲命工畫蕭翼賺蘭亭事並此爲二圖顧以兩家主客其意態非庸史可傳屢求其人未得也今觀此卷真有犁然當人心者軒轅翁傲岸奇古劉侯二君吟思窘急侍童執器旁睨亦若懽動者皆是妙處兼傳色師吳行筆類李精采出紙上左方連書連句楷法亦甚迥密惜題款蠹蝕不知作者主名計必是龍眠一流人也是詩或謂是昌黎戲作或以爲真出彌明雖晦翁亦嘗有辯因憶少小時侍客談此僕率爾對曰道士旣云不解人間書又何以知禮部韻邪客悟而笑回思此對二十餘年矣因評畫漫爾及之丙午秋日

啓

答西玄公啟

伏以魚桐一奏鳴石鼓於臨平鳳竹雙調振葭灰於嶰谷故眷彼攀依纖蘿施

於松柏均之臭味小草比乎芝蘭懷響必彈同情自附恭惟臺下海岳奇標煙  
霞逸韻羽儀天路鼓吹儒宗書傳圯上穀城黃石之精經授關中函谷紫雲之  
氣鵬搖鳳苑鷺振鸞坡玉杯繁露繙甲觀之虫編天祿蝦蟆剔羽陵之蠹簡才  
專八斗筆挽千鈞警鶴和其清音飛龜洞乎玄識情寄五言暢僊襟於牛渚心  
通七契寫梵響於魚山猶復獎飾下才收羅末品高談劉勰下問虞翻誦佳句  
於廷中假深情於格外自慚剪淺過辱揄揚

承恩

淮海豎儒蓬茅浪士倚門骯

髒挾策支離上不能鳴鍾佩玉紀竹素於麟臺下不能帶索披芻激薪歌於豹  
谷月旦雖工翻淹馬檣春秋已壯尙泣牛衣徒誇羅鳥之符誤忝屠龍之伎囊  
底新編踈蕪自嘆懷中短刺漫滅誰投真懷下里之羞詎意當塗之賞旣逢匠  
石寧避瑕疵是用代幣帛於承匡效芻蕘於累牘幸枉文人之聽倘增尺牘之  
光薦此下情敢因來使但念辭出應酬本無可采神分習業未盡其長刻雞何

取於鳴將繪草奚聞乎薌澤炙轂之談慙登孔席叩轅之唱懼入夔門伎倆屈  
於多方侏儒負其一節但願舍驪黃而求駿骨由玄素以得深心下堂以捐然  
明倒屣而迎王粲加之括羽賜以琢磨則董澤之蒲應茲而貫犀筆泗濱之石  
升堂以荅鳧鐘長鳴鹽坂之風大吐豐城之氣必能使呂覽高懸千金擬乎一  
字趙從立定九鼎輕於片言倘處囊中敢孤門下若復咤先容於蟠木陋小伎  
之雕虫激賞齊竽胡蘆鄭璞則浩蕩煙波狎江鷗而遠去低回道路載遼豕以  
空還更冀鴻裁不勝鶴望謹啟

請南渠呂公碑文啓

代作

忠貞繼美實闢名教之尊制作傳芳敢借元台之重儼廟貌之作新禮嚴郡國  
永人文於不朽光照山川緬惟先忠烈孫公抗逆忘身舍生取義功存社稷氣  
振乾坤逮我文恪公播館閣之清風表巖廊之雅望過庭有述肯構能成姚江



稽嶺鍾此地之精英仕路儒林盛多方之誦法顧在會城尙虛專祀惟茲闕典  
久鬱同情是用卜湖上之名區改官中之廢宇虔供伏臘永奉蒸嘗重念犧牲  
載麗欲紀事於穹碑鸞鳳呈祥須徼靈於鴻筆不避階墀之瀆同希海岳之篇  
仰惟我明公黼黻皇猷主張世道一言爲法九鼎猶輕念有切於綱常幸無遺  
於祈請况兼誼篤是邦仰望爰勤於合省風高同德表揚宜出於通家冀錫俞  
音言諧鄙願照映琳琅益有華於既往雕鐫琬琰庶永勸乎方來

壽師相中立高公啓

代作

忠勤體國治隆有道之長勳業康時天錫無疆之盛化源益衍壽域弘開恭惟  
尊師中翁老相公台座二代古心九重舊學望高王佐禮重師臣碧嵩清洛五  
百年間氣所鍾紫府丹臺二千歲遐齡已兆光騰台斗譽滿寰區茲當調鼎之  
辰正屆懸弧之節月維建亥歲履逢辛開一陽來復之先承萬寶告承之後

某

等叨官淮海隔遠門墻恩懷培植有慚桃李之芳念切瞻依願祝松椿之固共  
陳菲薄仰瀆尊崇首夔龍於殿閣彌深輔世之功廣麟鳳於階庭坐閱傳家之  
慶

請

公啓

代作

宇宙元功共仰補天之手春秋一統長懸捧日之心竹帛紀夫奇聞弓矢光乎  
盛典恭惟幕府一代鴻才兩儀間氣文輝德鳳望表人龍殊忠特簡乎聖知大  
抱久昭乎國瑞屬當倭擾往督戎征筭成帷幄鬼神讓其玄機身作金湯將士  
仗夫威令廓清江海界限華夷誠爲冠千百世之勳豈止活億萬人之命行瞻  
入相先慶班師霜清笳鼓總傳凱樂之聲風卷旌旗自帶發生之氣京畿遙指  
淮甸言經撫茲建業之辰况過舊遊之地某夙忝南宮誼故深慚北道主人願  
暫假乎尊疊冀少延乎節鉞薦誠毫末微寵須臾饋牢設饗寧足爲執事者羞

進酒陳詞敢代爲天下焉賀不勝馳佇幸賜從容

進酒陳詞敢代爲天下焉賀不勝馳佇幸賜從容  
天時次選事備露香散越懸新授樂感養風容孤城自帶封志之於京端蓋許  
好失魂存酒部正者果期華英補食飯牛首州之權量事活補萬人及命許權  
射火田平圖蘇鳳爲勢勢登雲致益轉以轉轉風地其之與其許金機轉金  
盤典恭謝蘇報供外則衣兩謝開於文職轉風聖人歸兼取赫而平聖賦大  
宇宙天地共此能天之年春煇一益身逐轉日之心許出以夫香閣戶犬炎午  
忠勤補國治時公將心長動是康時天錫無疆之德化海流新轉轉風聖人歸  
聖師中爲老相公百座二代古心九重商學高王佐時聖師是善高清洛五  
國誰謂轉轉風聖人歸心長動是康時天錫無疆之德化海流新轉轉風聖人歸  
射陽先生存稿卷之二

射陽先生存稿卷之四

障詞

賀裴永齋掌教膺獎障詞

并引

伏以風高南國播譽望於雙金賞激中臺動輝光於半壁教席弘開道有可行  
之兆官途泰發時當欲奮之機咸占氣運之隆益驗人文之盛三鱣講堂振新  
聲於鐘鼓群龍學海改舊觀於巾袍恭惟執事聞喜華源滇昌鉅姓外標金玉  
內蘊經綸下帷講誦沈酣二戴之經秉筆飛揚焯焯三都之賦掇葩藻於文林  
人誇好手衍淵源於道派天與淳心旌旄卓立獨高百粵之英木鐸敷宣疊秉  
八閩之訓有緣江左載陟山陽萃一方之髦俊屬我甄陶端多士之楷模章茲  
化育九畹芳蘭茁萌芽於膏澤重霄瑞鳳助羽翮於風雲兩端必竭亦何介於  
束修五教惟寬更寧勞於榷楚自見茂叔以來咸得忘言之趣凡出胡公所教

皆成有用之材績大著於鬢序名早聞於憲府將申鶚薦先示鴻褒稱揚滿牘  
薰聞姓字之香錫予承筐有爛威儀之備學者仰之彌見斗山之重先生升矣  
方嘉雨露之新諸生<sup>某</sup>等喜集瑞於儒宮遂徵言於藝苑圖流金石試按呂商  
唐腔宋調雖傳法曲之名點瑟回琴自合天機之妙禮筵展慶樂府登歌其詞

曰

仙杏花開瑞靄動講壇春色泮池曉蛟龍出蟄雨香芹綠雲路漸酬儒者志霜  
臺早刮監司目謝東風送得好音來超常格 千萬卷平生足七十子心中服  
儘宵中都只是愛人之德先世曾聞居美仕兒孫况更承餘福看來年淮海賀

遷鶯登天祿

右調滿江紅

賀章承菴視高郵衛篆障詞

并引

伏以鳳翔雲路高岡先寄乎一枝龍躍天門巨浪爰階乎尺木邁宇宙之洪圖

須歸俊傑朗風塵之妙鑒蚤識英雄咸誇國士無雙始信將門有種恭惟執事  
郇國高源婺州重望齊中偉度物表英姿上世以揮戈建業流光九代之餘先  
君則射策起家奪雋千人之上階級雖華蚤脫兜牟之習規模自遠不求書劍  
之名六韜洞究乎兵機三史優通乎學解錦獸裁袍出鷄群於武帥金魚橫帶  
控虎隊於軍牙載章掌篆之功兼領汎舟之役寶劍吹毛動光輝於六所牙檣  
銜尾會利濟於千艘屢勤臺府之推大獲縉紳之譽來儀斗野作鎮孟城狄宣  
撫初臨廣右几席生威李臨淮一入朔方旌旗變色申警令於貔貅風塵不起  
狎雅歌於魚鳥山水常閒茲者右階逢考課之期當路與褒揚之典不移舊任  
用代成勞兵符新下名益振於知韓戎幕重開事有同於借寇淮甸倉庚預報  
喬林之嘯江沙玄乙聿觀大廈之成親誼<sub>某</sub>等喜普蔭於鄰封侈增光於吾黨  
言徵善頌遂屬通家煙霄萬里占羽毛奮迅之初雷雨三春看頭角崢嶸之候

請填瑟調用配鏡歌其詞曰

地雄淮楚金湯國自古秦郵名鎮手握兵符大都看淮上選來英俊旗滿春風  
劍懸秋水號令雷霆迅精神鼓舞一軍勇氣齊奮况是奕葉蟬聯家傳文共  
武服膺遺訓快着先鞭筭功勳不負鏡中青鬢授鉞登壇丈夫天壤內自然之  
分銅章指日三臺換取銀印

右調百字令

賀徐新齋掌教生孫障詞

并引

伏以鴻基兆慶爰開男子之祥燕翼宜家喜續仁人之後光照龍珠麗文虹於  
子舍香傳鳳綵朗寶月於孫枝庸占道脉之長益壯儒風之振恭惟執事西浙  
醇儒東滄夙望神襟秋瑩天宇春溫錦標黃榜家承董賈之芳鍊摘韋編世闡  
田丁之學名重鉉槐爵經綸於政府教宣金木暢道藝於文林載觀江左之光  
獨秉山陽之化賞拔譽髦早動飛揚之勢吹噓寒素常勤孚翼之心令子石居

君稟靈氣於斗牛負遠猷於霄漢屢期擢桂行見穿楊方當強仕之年久切宗  
祧之念茲者慶門天祐華代神歆節甫屆乎梅辰吉有徵於蘭夢千里書題喜  
報鱗鴻之外百年文種禎符鷓鷯之間覽兩世之有承啓一門之鼎盛邑學師  
儒等同欽世誼大慰心期桑弧異國雖有隔於聞啼湯餅開筵敬相將而起賀  
言申禮幣過假文辭繩繩孫子載歌周室之詩袞袞公侯再和徐卿之句飛茲  
玉盞侑彼犀錢詞曰

淮岸水生綠看梅稍新陽初到早英飄馥錦字飛來先報道得箇鳳雛驚目雲  
氣繞講堂生色一派書香欣有繼幸今年添得兒孫福三葉盛萬緣足 持盃  
遙向南雲祝想春窗銀屏繡襖眼珠頭玉父子蘇家人共羨又看取斗郎相逐  
儘萬卷付之翻讀從此公家多樂事指青雲道路連綿續高門戶擁袍笏

右調



壽金月艇六十障詞

并引

伏以南薰解慍汎雅曲於虞絃北斗搖輝指靈雲於海屋故紺殿金樓化城移  
於福地鹿冠鶴帶臞儒列乎壽鄉恭惟執事人境眞仙市朝大隱襟披璧月思  
入珠霞山川動乎雄眺長懷太史之風湖海盪其冲心因識元龍之氣賓王用  
譽翼謝鳳於文岑幹父承家御荀龍於陸海坐忘人械靜葆天倪縹囊玉譔家  
藏米薛之珍金薤銀鈎筆擅鍾王之次寶華自曜玄牝常盈谷神靜而可淦山  
氣健而宜壽茲者嘉辰初度華歲將周崑崙鶴馭金支降而欲來渤海鰲宮玉  
筭布而彌積特陳高宴用閱長年是日也峯雲直乎繡楹蓮錦披乎朱幔雨鳴  
清泚松洶翠濤玉壺消夏光涵萬壑之冰金盃生秋涼沁三危之露日轉壽域  
天開醉鄉斑衣對舞和氣結而成雲玉塵齊揮賓談輟而飛雪黃耆入頌朱顏  
欲醅慶偕日永共孚長養之心福與年來直抵期頤之歲勞歌黃竹用侑清尊

詞曰

正綠蕉新雨畫閣明虹火雲初捲梧竹深深簇鳳笙龍管翡翠簾櫳鴛鴦池沼  
見繡筵高展玉盞齊飛斑衣起舞絳河微轉 詩禮家聲江湖氣味謝家門戶

鳳麟將顯慶澤穰穰名與楚雲俱遠席上頻揮壽爵歡笑裏共拚無筭從此相

期年年六月桂輪長滿

右調 醉蓬萊

壽金月艇八十障詞

并引

伏以稱觴獻頌先壽考之無疆夢筆摛才謂神仙之可學然而控鶴膠鸞或失  
區中之適卷龜食蛤徒矜物外之遊鞭有味於後先養每岐於內外亦豈若近  
市地偏自結真人之想出山志遠善修居士之身表門閥於松喬得衣冠之巢  
許古稱達者今有人焉恭惟執事機妙樞立神恬養素海爲川王地見山尊蚤  
呈端木之才時用子皮之術五嶽稱豪欲半舟車之迹四方有事言成弧矢之

心旋辭管鑰之煩大遂琴尊之趣荆樹情鍾引雙龍於玉圃蘭叢秀發翼五鳳  
於珠林兒孫各擅乎一科文獻式昭乎三世地據上腴美在脂膏之外門羅萬  
指祥生意氣之中心爲平物之衡躬是濟時之穀綵服朝趨光引藩侯之節密  
章晨下峨榮國老之冠健爽得於凝貞吐納資其繕性遐筭可期日檢桐君之  
錄幽棲自悅時賡芝叟之歌茲者開令秩於八旬慶芳筵於初度柘燧飛煙火  
行載盛桂輪碾月陰魄方圓當鯉庭捧檄之辰况鯨島洗兵之候酌北斗於瑤  
華同伸祝願指南山之瑞氣共醉昇平<sub>某</sub>等親聯王謝之芳世締荀陳之誼於  
翁修賀謂我能文巴人俚唱雖慙白雪之篇司馬徽辭倘有青雲之氣請填法  
曲用侑文尊其詞曰

南薰好時節正蓮波初灑梅霖方歇芭蕉展新葉映清冰寒溜錦筵排設談霏  
玉屑鬪冠冕琴棋羅列卷湘簾人世蓬壺池上洞簫吹徹 奇絕曾揮綵筆二

十年前爲公傳說此回更別喜雙鬢未垂雪看相將只過期頤之外領取恩榮

重疊引兒孫笑咏年年對他明月

右調瑞鶴仙

賀少岩傅公晋秋卿障詞

井引

伏以建牙開府中臺專漕輓之功弼教明刑內地切樞機之任故出則均勞轉  
星辰於執法入而分職依日月於經邦亮匿名公寧堪鉅擢恭惟執事學海文  
龍仕途威鳳璠璣清廟杞梓明堂桂林奪雋冠三楚於英年杏苑聯芳膺上都  
之妙選初試鷲遷蚤製廬陵之錦頻經鸚薦俄含漢署之香甲兵備見於籌邊  
藻鑑高懸於宰物指省闈之弘開方期傅奕歎方州之暫抑咸惜君山賜環喜  
報夫地曹鳴佩旋登平儀部憲節雄持人仰觀風之肅文衡獨掌材成化雨之  
甘繼藩臬之荐經赫撫巡之顯進齊魯名邦俱屬保釐之內江淮大計爰歸掌  
握之間屹千里之金湯聳中流之砥柱萬舸京儲歲濟九州之利雙城節制日

臻比屋之安心清玉盃之水化美金莖之露霽月光風衍濂溪之道派泰山北  
斗仰吏部之儒宗茲者清名久簡於帝衷碩德允孚乎士望五刑載掌九列崇  
登臯謨快矢遂與國之初心說命重宣演傳家之故事言辭下郡直上通津某  
備末屬於先驅忝同鄉之後進欣逢盛事僭述蕪辭馳驅魏闕遙瞻戴斗之勤  
夢寐商岩更願爲霖之早請填銀字用戒朱旂其詞曰

吾楚山川天下絕雲連漢沔波濤潤鍾英孕秀豈徒然地靈自昔生人傑我公  
生更別少年已負經綸業羨曾中平吞雲夢襟度照煙雪 從來文武常經閱  
况復中臺頻建節淮南無計可相留薰風催赴蒼龍闕此行真壯烈五雲高處  
升卿月看相將陰陽鼎鼎朝夕待調燮

右調歸朝歡

約庵周公陞南京刑部尙書障詞

并引

丹霄麗彩朗卿月於南天紫極流光轉法星於上國故漢室尙書尊如北斗周

家司寇職統秋官風行鵠舉之辰道際鳳鳴之世恭惟執事海嶽奇材乾坤間  
氣羽儀政府領袖儒林扶搖直上摩寶月於瓊樓獻納司存灑清風於瑣闥三  
遷諫省載掌天閑綵線補於舜衣雲錦蕃乎漢苑臺端繼踐關右攸巡繡袍珠  
劍引長嘯於龍沙玉帳牙旗振雄風於雁徼累著籌邊之績竟成服遠之功戎  
幕初閑本兵再晉薦書屢被督府重開召唐介於蘭臺得薛宣於石室坐江淮  
而引吳越濟萬舸之軍儲控廬鳳以帶青徐安數州於衽席帡幪萬姓雨露群  
材相重禮而清重刑決大疑以定大事除奸屏盜興學隆儒動物惟風下民應  
之猶草降神自嶽學者仰之如山日轉天回人賴千鈞之力海涵春育家懷六  
載之恩茲者忠簡帝心名孚國望弼茲文教掌彼邦刑風清棘樹秋行江左之  
天雲護棠陰春滿淮南之地前茅將啓下佐遙迎錦衣故國還如鸚薦之初紅  
旆留都重指雄飛之處<sup>某</sup>等叨承教惠久奉周旋心期夙嚮乎達尊嘉會又觀

乎盛際雖勤瞻戀共喜騰騫六朝山水同看八座之榮五夜期辰早見三台之象奉歌小調用戒前驅其詞曰

清歌三疊又擊長淮楫一紙丹書來自九重鳳城龍闕共喜英雄當盛世更看取古人風烈相將去爲國著龜代天喉舌操履潔瑤臺雪襟宇澈冰壺月問

度量何如論汪洋人道似海天空濶足底陽春行處滿袖中經濟拈來別待玉

燭三台調太平事業

右調帝臺春

大中丞白溪張公歸田障詞

并引

靖躬是獻內外等於經綸滿志而藏出處由乎義命故開府通津卽是江湖之長歸田盛世誰知社稷之臣天隨魚鳥之間道在龍蛇之際恭惟執事兩間正氣三代遺才鎮國元龜瑞時威鳳甲科豹變基雅望於清琴風紀鷹揚振靈聲於繡斧歷登臺省載肅朝廷轉執法於台躔藉觀風於節鎮控茲四郡康我群

生禹金鑄粹難藏魑魅之形楚玉流光自息氛祲之氣寬絲節費止役蠲工官  
無強賈九式而通市廛肆禁姦私一言以定泉貨絕梟盧於遊手伏虎兕於豪  
胥巫風永革寧聞小海之歌伎藉俱空盡變大堤之俗風移齋祀迹掃優伶負  
芻之輩靡驚刻木之徒敢肆畜閘水以利漕舟何知大吏清郵符而安驛傳豈  
顧私交栢霜氣勁纖塵不入乎垂簾海月心懸一字無求於秉軸風行暗室聲  
動隣封醉鄉可臥獨甘江上之醒巧宦相妍無改山中之拙果來官謗大鬱輿  
情返老臣於綠野猶懷當宁之恩結小隱於滄洲又遂投簪之志任怨丘山逆  
知今日誓心天地敢負平生何傷日月之明行致風雷之變顧草芥之萬鍾何  
加於我指菊松之三逕自適其天郡學師儒等久承仕學之規式奉修齊之訓  
眷言違隔靡遂瞻依袞衣故里難爲詣闕之留祖帳都門載下臨岐之拜敢論  
國是共悵民棕鼓鍾咏德能忘雅頌之音絲竹宣情聊致俳諧之語奉歌小令



用戒前旌其詞曰

宦海堪驚日日風波浮沈未量嘆漢馬元功已塵青簡蹇驢孤館未熟黃梁主  
管籬花平章溪月更有誰人話短長從前事筭來無愧歸去何妨東臯雲暖  
茅堂看魚出寒簷稻上場有栗里淵明一床琴酒成都諸葛二頃農桑五鳳高  
樓誰爲柱石大澤深山鎖棟梁明朝有鶴書來到莫閉山莊

右調沁園春

賀金秋泉翁媪障詞

并引

伏以天敷瑞祉惟偏福德之門人際昌期俱帶神仙之氣故千歲靈籌喜雙添  
乎海屋四時壽酒幸兩接乎蓬萊在昔猶希於茲特異恭惟閣下鳳鶴仙襟鸞  
鸞華胄鴻才抗世燕喜宜家門生妙選久知逸少之名隱者高風自合稚川之  
配劍學猿翁論雌雄於寶鐔書傳驪姥題內外於瑤函羸金手授乎一經形管  
心師乎六傳煙月五湖麗南宮之畫舫花鐙丈室禮西竺之香筵居身夷惠之

間振譽姬姜以上日近靈椿接龍光於瑞桂露溥慈竹籍鳳采於崇蘭茲逢六  
袞之躋更喜一難之並皓首相看話鳩車於蚤歲青春常在計鶴算於遙期雕  
弧將錦悅交懸金母與木公齊降月館開尊笑指忘憂之草秋堂舉案先浮益  
壽之花亦豈若鹿門終日唯耕碧甸之烟牛渚雙星徒望銀河之水寄泊臯橋  
眇周流於五噫豪華秦地詫恍惚於俱升者哉親誼其等久叨猶子之班夙慕  
如賓之懿臭蘭同味施栢懷私瑤舟載汎重酬具慶之筵朱芾斯占益驗和鳴  
之卜義徵風始情寄詩餘其詞曰

畫閣閒登碧欄共指南山秋色爭高聞鳳凰聲巧風度羸簫瓊筵簇簇班衣繞  
歌眉壽齊獻香醪人人都道仙家秦晉陸地松喬笑看寶樹相交更祥鸞對  
舞老鶴同巢每一年一度疊賞蟠桃細將甲子從頭數從今去花目朝朝相將

看取一雙丹誥光動珠袍

右調金菊對芙蓉

賀金耻齊翁媪齊壽障詞

并引

伏以風高同德天開同室之祥福衍齊年人羨齊家之慶故內政操持內子配諸侯之位大邦藩屏大夫當小國之卿將流奕世之光豈直一方之瑞恭惟執事器重璠璣聲和韶護鳳儀仕路豹蔚儒林射宮選俊蚤穿建業之楊文榜蜚英俄擢燕京之桂翥淮水之雙鳧功存北障詠蘋鄉之五馬光照南州方彈大國之冠遂解修門之綬教邃家傳萬卷皇王之業趣高林隱一編農圃之書令配某夫人閣下孕淮海之名門習江沱之懿範載繹積薪之義允符采藻之章尊姑尊舅有懷烏鳥之情諸子諸孫式溥鳴鳩之愛警戒鷄鳴出茂青雲之助優游龍臥入同綠野之間茲者金穰喜歷乎庚申玉曆同周乎甲子仲夏杪秋互逢初度高天厚地共啓長年瑤池王母重來西極之桃栗里淵明又醉東籬之菊萃百口之雍和道中一樂撫衆緣之具足物表雙全等聯中外之親誼

與先後之禮會欲譔盛事過藉蕪詞

某

久通元禮之家兼慕少君之德茲焉有

激敢曰無文瓊卮疊進仰祈鶴鹿之齡錦瑟高張更奏鸞鳳之曲奉填法調用效和鳴其詞曰

雲湧蓬壺畫堂香細錦筵清晝管絃齊奏同稱慶歌酒一年前後方纔過了端陽又重陽時候人都道一對神僊年來萬緣成就况有丹桂天香與靈椿萱草並芳交秀歡情輻輳愛山水長是共人依舊把功名付與兒孫看他時還又從今去偕老平安年年雙壽

右調雙頭蓮

賀周蘭墩陞都督障詞

并引

清時建節控虎旅於風雲壯歲逢辰近龍光於日月玉帳牙旗兼總樞機之任碧油紅旆宏叅出入之權共仰崇階允歸時雋恭惟執事奕世文儒邁儔英度采毫映日寶鏐干霄脩門射策早承甲榜之恩弱冠論兵遂振元戎之望七略

九流照龍珠於學海五車三篋鳴鳳管於詞林人傳孝友之風天與英雄之表  
三楚儲胥轉帆檣於赤縣八閩戎節寓儔策於清尊旋勤陟岵之心遂決歸田  
之計復資鴻略遠撫蠻方渠陽十政已聞弦頌之音淮海頻年復著金湯之績  
領節鎮於卿山益光祖業重縉紳於士論克紹家風譽滿巖廊慶生門閱丹青  
直上紫禁遙通今者騰鄂薦於中臺啓鵬飛於督府微機共贊大議時參折衝  
萬里廟堂談笑之間總帥六軍圖史從容之際較公瑾於東吳箕裘更茂論絳  
侯於西漢黼芾兼優唯茲創履之升更感旌麾之隔爰陳祖席奉戒離觴建牙  
吹角共欽將相之才佩玉鳴鸞先和仙神之曲請填瑟調用協饒歌其詞曰  
花外繡旗翻海月河橋畫戟森成列望中一片玉京雲東風窈窕歌三疊丈夫  
心自別陰符囊裏看勳業碧天空雄風萬里正是好時節平生文武雙奇絕  
此去功名真偉烈油幢親掌羽林軍玉珂時直蒼龍闕玉函閒寶鈇一揮白羽

強胡滅畫麒麟印懸金斗須信有豪傑

右調歸朝歡

贈衛帥某榮膺選任障詞

并引

伏以干城千里高標熊豹之姿節鉞三軍坐振貔貅之氣奕世飛鸞得時髦於  
將種逢辰拔擢啓壯業於戎行將依日月之光先起風雲之會恭惟執事閱  
世勛韜鈴偉噐書傳石叟劍學猿翁斷決則寶刀照夜動光景於吹毛精神則  
玉隼橫秋矯風煙於聳翮駿邁則紫燕排空騁千都於歷塊意氣則文虹掛澗  
爛五色於干霄早膺當路之知爰重連城之價衛符獨掌軍政專司策駑厲鈍  
剔宿蠹於崇朝潤朽噓枯結深恩於庶伍光弼軍門氣變旌旗之色亞夫營壘  
風清刁斗之聲茲者奉王事於賢勞領京儲之重任撫臺妙選督府精求亨衢  
駁歷應占發軔之初漕政淹通行奏轉輸之利庾節皂囊應上虎牙之績漕河  
紅粟共看鷁首之飛親情某等寄欣慶於揄揚假文辭於藝學飲之芳醕餞以

長言處囊趙邸已觀脫穎之奇仗劍淮陰應遇登壇之薦請填銀字奉侑瑤舟  
其詞曰

錦袍駟馬紅旗颺人共羨年華壯孫陽一顧已空群到手功名誰讓諸軍掌篆  
千艘領漕的是多聲望 當筵先勸花間釀試放取長鯨量男兒忠孝是平生  
穩步青雲之上黃金鑄印封侯萬里要畫麒麟像

右調御銜行

賀楊封君七十障詞

并引

氣含海岳協嘉運於千齡慶集乾坤動精光於七政故福地天全人中上瑞壽  
鄉日晋物外奇觀恭惟執事盛世遺賢名邦大隱勤勞樹德澹泊藏真心能木  
石寧懷犧象之文道在丘樊自服龍蛇之氣鹿門舒嘯漢渚忘機躬耕谷口居  
身夷惠之間避世墻東托志羲皇以上仁能急病義不離群山公愛弟尤鍾隔  
世之情竇氏傳家自有義方之訓是以天惟助順民復歸仁門輝鳳采朗麝月

於蘭枝地啓龍光接鵬雲於梓樹恩推瓊闥禮振鬢宮日華製蜜之章雲擁象  
天之席彌深退挹無變冲夷茲者華歲開夫勞齡嘉慶昉於七袞神明益茂體  
力逾康紫泥繡黻寓軒冕於山林玄髮青瞳見神仙於邑里戶對三花臥遊嵩  
少門環一水坐對蓬萊千歲莊生之樹粵自心生三公王氏之槐益徵手植雀  
報弘農環留世世鶴飛遼海書寄年年是月也陰律中乎應鍾陽馭總其玄轡  
奠茁瑤階上旬未浹梅披璧戶華誕重臨傾白社之芳尊接青山之雅會玉盞  
齊揮歡生綺閣班衣起舞光間珠袍雲璈九氣共傳世外之音玉檢三章別有  
仙家之譜敬填錦字用薦瑤卮其詞曰

乍雲嬌梅月玉瑩冰壺曉寒初透日轉簷花又是小春時候繡戶鳴鐘金尊送  
酒醉畫堂清畫華髮青山紫泥丹詔太平黃耇 共喜地接鸞鸞門翔麟鳳人  
生樂事半歸公手况更康強此福世間希有莫惜千場酩酊山與水鎮長相守



待封比三台年開百歲重

下缺

賀總制梅林胡公奏捷障詞

并引

平黃

大喜

伏以華夷一統尤嚴內外之防覆載兩間實藉平成之績作鎮乾坤十萬里長  
風獨振鍾靈海岳五百年間氣載生國有人焉吾無患矣恭惟臺下政府羽儀  
儒林鼓吹巖廊柱石宇宙津梁得異人於科目先開捧日之心抗遠志於班行  
素號補天之手掇擊群壬下風霜於露簡肅清百辟走雷電於揮毫屬當海島  
之驚蠢爾倭奴之變憑陵內地騷動重溟肆蹂踐於江淮極創殘於甸服授鉞  
雖頻靡愜在廷之望韜戈未卜徒厘當宁之憂值明公出按之辰是狂寇貫盈  
之日奇功早奏浩氣橫飛旋晉建乎撫臺遂雄開乎制閩地極東南總歸統御  
階分左右咸備馳驅號令出而山岳難搖籌畫定而鬼神叵測計剿渠魁直擣  
鯨鯢之窟身先士卒親當蛇豕之鋒幕中懷必報之恩麾下奮無前之勇挽銀

漢於玄穹洞澆虐焰鼓颺輪於大塊盡蕩腥風始終不過乎數年大小寧論乎  
百戰造化生成奚啻兆人之命安穰整頓誠爲萬古之勳妖氣去而瑞氣來捷  
書上而璽書下冠蓋相望極褒章之溫厚絲綸數降疊賜賚之駢蕃荐加爵位  
之崇兼煥服章之盛漢室上將軍內傳青宮之重周官大司馬出專烏府之尊  
握樞四省壯藩翰之干城留鑰二京護衣冠之寢廟鼎象雲雷采食萬家之邑  
旂銘日月茅分五等之封昔者七縱妙孔明之畧未遇昌時一匡懷敬仲之仁  
有慙王佐賈馬雲臺介冑無聞於黼黻齊梁黃閣貂蟬翻出於兜鍪勞哉充國  
金城小矣伏波銅柱赤壁東風偶與周郎之便蔡州夜雪元非裴相之謀豈若  
我公學爲伊傅眞傳身履唐虞盛際擁七寶之油幢偏裨衛霍照五文之綵筆  
賓客鄒枚錦裘玉帶爭看將相之標羽扇綸巾更挹神仙之氣獨運玄機奠神  
禹九州故蹟萬全勝筭祚皇明億載太平是宜謳歌鼓舞遙騰動地之歡壽考

康寧允納自天之祐寵錫命圭初世再世而傳永世光昭信史大書特書而不  
一書某學劍無成請纓有志末由叨奉私幸躬逢况荷庇於一枝念猥長於寸  
管爰稽故事用譜新聲諧和律呂媿非鸞鳳之音模寫形容竊比麒麟之畫請  
填銀字用配彤弓其詞曰

指揮天地能事元非細偃息波濤掃蕩烟塵亦何容易手布陽和春到處更曾  
次與秋無際慶明良雨露長垂風雲相契 對上帝精誠意爲聖世靈長計論

丹衷總一點不傳之秘富貴人誇全福享功名我道孤忠致看入履三台調太

和元氣

右調帝臺春

贈司理雲澤王公欽選障詞

并引

伏以韶聞九奏覽儀鳳於虞朝劒躍重淵起翔龍於楚甸捧日下之丹書新霑  
雨露指斗間之紫氣永脫風塵幾開將相之先籍列神仙之內大匠掄材允合

棟梁之具真丹獻瑞初收爐鼎之功仰屬時來欣占泰發恭惟臺下政府蜚英  
文林振望門傳科甲家襲謨猷鯉趨承訓聞詩禮於髫年鴈序馳聲和埴篲於  
伯氏氣蓋全荊益闡青箱之業曾吞七澤橫飛彩筆之光壯杞梓之大成美圭  
璋之特達南國名登摩桂香於璧月上林賦就裛杏艷於珠霞載欣吾道之融  
實賀斯民之幸惠茲敝郡司我祥刑高懸寶鑑難逃萬物之形洞照水壺寧有  
纖塵之翳忠愛常存活枯荑於幽谷聰明悉致解疑綱於棼絲非惟胥史之難  
干更是貴權之莫奪郡閣增輝弘贊專城之績憲臺倚重靡辭環轍之勞未離  
貳乘先勤海宇之圖前有脩程益慎康莊之步色動搢紳沸政聲於當路功超  
案牘累薦扎於中朝未嫌富貴之逼人共美功名之到手一紙遙傳天府來徵  
賢之報四民交賀仕途看發跡之辰還如黃甲重登兼值青庚甫壯在昔寧論  
償三載勤渠之債自茲而往遂平生康濟之心方當有愜於榮觀忽爾又牽乎

別緒前途將啓下國難留花明冠佩新依日月之光柳拂旌旗總帶風雲之氣  
請歌法曲用暢歡聲其詞曰  
晴淮雙郭正暖變遷鷺喜傳靈鵲紅旆穿雲綠楊經雨珍重玉壺離酌回首樊  
籠已謝一舉快搏寥廓翱翔處看天風環珮碧霄鸞鶴高擢經綸手分內乾  
坤不負傳家學諫省榮陞台司豫待先賦玉珂金鑰多少憂民深意盡在佐時  
英略從今去勳名只到紫樞黃閣

右調喜遷鶯

贈邑侯湯濱喻公入覲障詞

并引

伏以萬邦玉帛近日采於天衢千里旌麾拱星躔於斗極故內府霑恩共仰周  
京之盛外藩奏最咸推漢吏之循獻莫大於民功禮實重夫元會有昭良牧懿  
我康時恭惟執事上國奇標中州道望羽儀政地黼黻儒林花明綵筆擬空冀  
北之群桂馥雲袍早重周南之價紫氣連城歎牛刀之小試清風百里領虎竹

於初分筮仕淮方爲光海邑政先愷悌治出神明纖塵不染湛皎月於冰壺萬物難加障驚瀾於砥柱敝屣官曹惟切瞻雲之念括囊經濟猶懸捧日之心因民之利屢興造士之功大著盜息萑苻淨掃黠黠之跡訟清枳棘坐消雀鼠之風茲者奉民數於黃圖指天家於紫禁前茅戒候若木開塗尙方鳧鳥已占變化之辰南國鶯歌卽是陞遷之會覽雲氣之高翔盡成五彩慶冰霜之旣歷行及元春邑學師儒等感色笑之久承喜騰騫之在近欲章盛際遂假蕪詞九霄直上何殊跨鶴之仙它日重來共指乘駘之客願陳別曲用表留思其詞曰  
聲重河洛青箱有家學百里弦歌聊復施張濟川方略腰下青虬時一吼光亂射曙星芒角行行近一朵紅雲鳳城龍閣心安在丘和壑家何有琴兼鶴太平時人共道祖鞭先着青鬢功名期竹帛丹青事業聯花萼喜脫去風塵翔玉

京寥廓

右調帝臺春

賀邑侯念吾高公擢南曹障辭

并引

伏以漢家循吏入高天府之資周室司徒分掌地官之教三載賢勞喜風塵之已脫五雲徐步兆霄漢之初登龍升起震之辰鳳記來儀之地恭惟執事三代古心兩間正氣璫璣表德杞梓呈材唐虞講業望標東魯之風洙泗傳經秘啓西河之學桂殿攀花襲秋香於麝月楓宸射策絢春色於鵬雲咸推剖竹之才暫借分符之寄惠茲敝邑幸我疲民屬六年五潦之餘正十室九空之際手布陽和大費回天之力身爲保障長勤濟世之心往來沿檄利吾邦肆及他邦出入戴星勤民事真踰已事移稅代逋租肯飽豺狼之欲編徭除積弊洞知魑魅之情纖塵不染乎冰壺庶物難逃乎寶鑑土炭低昂自有權衡之審桔槔俯仰實慙機械之勞楊遵彥閱人過目識半面於乘驢陶士行記事如神指多年之盜柳喜怒不形屹若崇山之鎮姦豪自服沛如流水之歸茲者動變化於雙鳧

首褒揚於一鶚版曹晉秩京庫須才金陵佳麗神仙開山水之鄉粉署清優仕  
宦帶烟霞之氣出自平陞尙群情之有鬱伸於久屈卜吾道之將行某等念荷  
庇於帡幪更銜知於禮遇國之社稷人民已欽名績我有父兄子弟况沐殊恩  
覽犯輟之已陳悵攀轅之莫駐采諸輿頌用作離歌南淮采筆聊題送遠之襟  
北闕珠袍行聽還朝之佩慙非嘉藻竊比甘棠其詞曰  
望高神岳見小試經綸水鄉山郭月帶星披風梳雨沐不識宦游之樂肯憚身  
臨畎畝惟恐民遭溝壑嘆年來雙眉不展寸心如灼某無忤方寸地可對青天  
用表平生學子部從容留都雅重無復向時纏縛從此乘風御氣直上九天寥

廊功名事在鳳凰城闕麒麟臺閣

右調喜遷鶯

賀閣雙峰晉官醫院障詞

并引

伏以慶鍾閔閱瞻日月於亨衢寵荷冠裳會風雲於盛世鵬運南溟大振昂霄



之勢鷲鳴上苑欣當出谷之辰禮樂舉其光儀人物關乎氣運天開嘉會地屬  
人英恭惟執事三晉名家兩淮鉅望鑒懸朗月氣吐晴虹飛揚翰墨蚤馳鉛槧  
之聲綱紀經綸小試牢盆之業稷下仲連比片言於九鼎山東季布重一諾於  
千金明開閭室之鎧義溥凶年之穀顧盼無前藐萬人而獨往樞機有道屈群  
策以知名尤高利物之風更篤和家之道代弟鳴冤光復膠庠之舊爲兄祈嗣  
祥徵宗祏之昌賞員質贊粹穆家酥酪醅醐羯末封胡撫謝氏芝蘭玉樹富貴  
逼人喜扶搖之可接功名到手知福祿之方來弘宣助國之功榮奉拜官之令  
范老孳生終奏平吳之績卜公畜牧還成佐漢之名占仕籍於通津列清銜於  
內署寶鑄秋金佩雙龍之斗劍光生畫錦馳四牡之星輶丈夫之志初酬君子  
其文一變長傍煙霄何異攀蟾之客來歸鄉里渾如化鶴之仙親友<sub>某</sub>等喜紅  
錦之添花羨烏紗之照影樂之尊俎侑以弦歌燕臺買駿爭誇結駟之游楚國

揮犀先和翔麟之曲請填銀字奉送瓊卮其詞曰

太平時節看騮馬驕嘶玉京風月官授中銓銜標內秩拜舞紫雲雙闕仕路先看捧檄客館無勞彈鋏更羨取照使星原隰威儀全別 豪傑當時務貫滿胷

襟玉塵閒飛雪父老歡迎公卿禮待迥與世塵遼絕試展平生籌策行見叫雲閭闔它日裏有驚人樹立非常功業

右調喜遷鶯

賀松窗陳孝勇冠帶障詞

并引

伏以孝篤天經根本立乾坤之德勇標人傑精神鍾河岳之英有生莫重於盡倫當世尤高乎赴義遵海而逃誓命遂安親之願望塵而往奮身成獲醜之功芳風蚤扇乎臺端盛事先傳乎海曲七袞鴻冥已謝榭楠之用一朝豹變還延桑梓之光際會方來見聞同慶恭惟執事德性敦仁天資合道雲融春宇月皎秋襟靈明洞照咸推闔室之鎧利濟弘宣共仰荒年之穀得季路之片言吾無

盟矣奉魯連之一諾彼有人焉徑多車轍風生珠玉之談家啓書香日映琳琅  
之器被髮纓冠以方便而行方便解衣推食視饑寒猶已饑寒室中寧計乎有  
無眼底何殊乎貴賤半夜叩門不負如山之託四方入境真同流水之歸屬當  
島嶼之震驚遂致鄉關之播蕩念彼慈闈恐遭罹乎寇盜負而避地肯顧恤乎  
妻孥直穿猛虎之群果慰報烏之志立宰扶持喜萱堂之無恙赤誠昭格幸楡  
社之獲安還興敵愾之心益奮驅除之力鳴劍直前三折鯨鯢之首擐旗取勝  
全張雕鷲之風王休徵獲魚致雀千載同符周子隱射虎斬蛟一方感德論出  
於公大沸儒林之頌賞加乎善蚤來臺憲之褒門楣已被乎標題章服兼承乎  
寵錫首斥烏紗頓改塵埃之舊膝環綵袖行霑雨露之新某等襟期夙締乎苟  
陳義例遠沿乎斑馬欲申嘉賀用假蕪辭湘東銀筆重看懿行之書清廟朱弦  
別有遺音之賞先之序述繼以聲歌其詞曰

擾擾紛紛風塵眼底誰是英傑我愛陳翁平生意氣真與凡流別孝哉爲母勇  
於討賊頗有古人之烈幸平安四筵賓客北窗笑傲松月 聲名贏得一方雷  
動芝榜蕙楣高揭當道飛書衣冠榮授出入多光燁英雄雖老優游三徑曾次  
尙猶奇絕看它日門庭衍慶寵光重疊 右調永遇樂

賀閩雙溪令嗣登科障詞

并引

伏以鳳鳴阿閣自啓瑞於丹山龍躍天衢本潛精於碧海故上國觀光由秉義  
方之教中天賜祐惟徧福德之門在昔有然于今益驗恭惟執事三晉高資兩  
淮鉅望襟披璧月氣發珠霞筆床茶竈夙恬一壑之心蓬矢桑弧早遂四方之  
志師計然而得術宗膠鬲以馳名英聲動物九鼎輕於片言義概先人千金比  
於一諾行不由乎矯飾業大振於弘通况復訓啓趨庭光流侍膝靈椿獨茂寶  
樹四榮齊標瑞世之姿先薦逢辰之慶仲嗣 君精神貫斗羽翼昂霄長淮仍

歲搖彩筆以飛揚大鹵今辰轉華輶而定省適遇秋之闡啓遂諧月殿之登雕  
弧此日貫楊葉以無疑紅錦來春知杏花之有待學館工夫從茲慰矣親闈志  
養不亦怡哉姻友<sub>某</sub>等重素契之通襟喜清時之得志欲申賀悃爰假蕪詞璇  
空萬里已看鵬鷲之騰錦浪千層佇見鷗鷗之化請填鸞唱用繼鹿鳴其詞曰  
廣寒宮闕喜金粟含芳細飄香雪寶樹摩雲珠袍挹露早向九霄攀折幸遇文  
明世運正屬少年時節宵襟裏有虹霓交射星辰羅列 英雄從淮海千里歸  
來一戰成奇捷秋榜高魁行魁春榜喜事自然連接賢路平平蕩蕩正要丈夫  
施設相待去看亨衢直上安排勳業 右調喜還鶯

賀吳春洲舉善障詞

并引

伏以善人爲寶樹宅里之風聲公道斯存培國家之元氣故感出于天盛德不  
言而化脩之在我令名無翼而飛桃李下自成蹊芝蘭秀在空谷衆口稱甘蚤

獻登筵之實群英讓瑞咸入室之香自夫春秋之義不明月旦之評靡定圖  
寫形容孰是丹青之鑑標題品目終迷皂白之眞幸也此風暢於今日恭惟執  
事圖史清襟縉紳華胄高超世網靜解天弢心田自種勤耕獲夫有秋性海無  
波舍筏登夫彼岸擇地經行可數往來之跡應時唯諾曾無煩易之辭墳簞協  
夫義聲弓冶章其善教地出醴泉照棠花於德鳳天包震澤鼓桃浪於文龍結  
玄覽於山川寄遠心於闐闐市上懸壺不貳低昂之價漢陰抱甕全冥俯仰之  
機平生魯男子安知胡蝶之春晚節楚義夫甘守鰥魚之夜寒暑推遷一任鷗  
鵬之運晨昏作息兩遺燕蝠之爭茲者臺端開甄別之科邑長舉褒嘉之典士  
林首薦輿論僉諧賞拔風塵之外何異登仙發舒天壤之間更榮出仕縱有妬  
能無可興夫媚疾雖工毀善安所指其疵瑕已懲之慝動夫遷善之機未達之  
賢喜有得朋之助此際鄉評卽是他年信史一方盛事布爲四海良規親友

等徵作德之日休快同聲之相應合謀頌美假手疎蕪金羈一顧已空冀北之  
群銀筆三編無愧湘東之錄敬陳里語用介邦光其詞曰

世塗顛倒嘆萬事糾紛更無分曉龍雜常魚鱗群野獸鸞鳳混同凡鳥何幸吾  
鄉清議特地大開公道最喜是有春州居士栢臺褒表 眞少百里內名字生

香此舉應非小富貴從他黃金到斗二十四番書考何似一生無愧人瑞國珍  
家寶更指日看鯉庭稱慶桂枝攀早 右調喜選鶯

賀思翁受封障詞

并引

伏以九重錫慶沾鳳闕之隆恩三極呈祥驗鯉庭之明教抱節含芬素履允孚  
於國典勸忠移孝立穹載眷乎人文繁喜方覽其大來多福實由於自取恭惟

門下

百粵眞才兩京正學後凋松栢早馥芝蘭一經成訓義方自妙乎心傳萬

石遺芳孝謹聿遵乎家法雙龍是育一鳳先騫有懿中翁高登甲榜禮樂三千

麗朝端之黼黻甲兵十萬靖江北之風塵昔年蘭省已頒錦軸之榮今日薇垣  
又捧綸音之盛凡此寵光萃於門閥揆之理義實有源流况世澤之永延正春  
霆之待發金玉相輝動精神於棨戟填篋迭奏繞瑞采於斑斕淮郡某人久依  
芳梓之陰上藉靈椿之庇載欣盛事爰激私衷台星呈象佇有俟於三槐霖雨  
施功喜先階於尺木奉填銀字遠侑瑤卮其詞曰

萬卷曾藏平生自許高步天表一脉傳心明時威鳳國瑞人之寶雲衢咫尺乘  
風直上共羨九霄孤矯人都道濟世嘉猷眞成不負家教 滔滔慶澤方來未  
艾始信移忠由孝紫誥丹封恩波重疊橋梓循環報優游蔗境榮華福德眼底  
世間眞少更看取斑衣玉佩宴開蓬島

右調永遇樂

賀杜鳳山遷新第障詞

并引

伏以天開瑞祉迓福德於更新地兆祥符履高明於擇勝闔闢靈機大利出小



懲之後卷舒妙算一勞收永逸之功恭惟執事關輔名家淮陽鉅望風高耆舊  
德稱膏腴天倪靜葆木鷄却敵於名場人械全銷汗馬策勳於心地獨茂靈椿  
之秀三披仙桂之芳伯氏則聯班內署近日月於金閨仲季則通籍賢關照雲  
煙於璧水淮有雙洲舊擅盤桓之地唐開二曲重依密邇之天茲者偶懷瓠子  
之虞遂奠盤庚之計更諸爽塏別有經營枌榆不隔載殊新舊之觀桑梓相聯  
更異高卑之勢工部情閒見浣花之卜築樊川興逸遂敷水之幽棲炎天冰雪  
燕雀賀夫初成澤國雲霞鷺鷥驚夫創見某等共羨慶源之盛言依仁里之安  
因假微詞用章懿典傾玉壺而醉月披錦席以生香班衣相映同欣今日之歡  
朱芾斯皇還卜他年之兆通襟此地取義斯干其詞曰  
西湖清曉記萬井樓臺瑞煙繚繞堪嘆年來星移物換一片露昏波渺共羨僊  
翁識變縮地用功非小正好似飛僊拔宅高出塵表 懷抱看從今出入清安

更比前時好鳳有高梧龍階尺木何必十洲三島袞袞穰穰受天之慶家有國  
華人寶喜年年醉扶靈壽笑餐芝草

右調喜遷鶯

贈郡伯養吾范公如京改秩障詞

并引

伏以世緣雲變卷舒隨遇物之機吾道天行義命自居身之要故愧忤全亡俯  
仰得其至樂怨尤何事天人混爲一途歎誰哉實獲我心諒公也無慚此語恭  
惟執事學會百川鎮隆五嶽音和韶濩寶重璠璣鳳麟瑞世寧湏猛鷲之姿魚  
鳥忘形自得沉潛之趣蚤獻策於金闈龍翔甲榜旋含香於粉署鷺振西曹精  
明大著夫平生幽隱弘昭於瀚雪百鍊彌堅允表經綸之望纖塵不染益彰水  
蘖之聲屬傲地之創殘極在廷之妙選坐分符竹出把旌麾雲霓千里爰孚望  
雨之心草木三冬忽變回春之色挽元氣於更生官中盧扁奏奇功於不戰儒  
者孫吳哀軫水潦之餘解息兵戎之後感將迎之費鉅兼征調之岐多馳詞執

禮亢當塗豈啻再三節用愛民減旁郡幾於八九一介不取諸人乃其餘事萬  
鍾何加於我肯負平生疲癯悉納之懷中得失久置於度外班定遠言論平平  
志存安輯陽亢宗考書下下政拙催科自傷作守之難寧敢司農之對喟垂橐  
而孤征兼無琴鶴決拂衣於目下何待著龜雖云就道之輕尙有憂時之戀楚  
國亡猿在事機而叵測塞翁失馬占福澤之方來終期台斗之登行致風雲之  
慶某等泮宮感化石室成規過假鄙言用申離緒驪駒載發徒牽遠別之襟隼  
旗輕搖尙冀重臨之日請陳犯輟用解攀轅其詞曰

勞苦淮陰邁用裹雅懷全別試看取轉移造化變愁爲悅歲旱連天三日雨雪  
空萬里三秋月更屹然砥柱立中流堅如鐵一心只爲蒼生切事可對青天說  
儘平生行履處古人塗轍世事任教翻局面勳名自有來時節待他年聖主得

賢臣弘功業

右調滿江紅

壽魏國徐公子六十障詞

井引

伏以天回瑞斗駐麗景於靈樞山擁神州指真源於福地故潤襲龍波自動雲霞之色芳傳鳳苑遙分海岳之光福與道爲大同人將境而兼詣眷言殊德實瑞康時恭惟執事聖世外臣元勳上嗣門兼將相地接神僊山河百世功垂日月之旂戶邑千家采食雲雷之鼎翳蘿薜以開朱邸儷旌旄而栖碧山承匡四海傾心毛薛之交飛蓋三臺托志應劉之會世締椒風姜任柱國庭披桂月王謝宜家振信陵之高義魏國藉以逾尊飲商頌之清風東園鬱然居首六代野情地宜佳麗四公高胄谷尙逍遙茲者冲襟葆其太和玄匠賜夫明祉曼齡已兆始壽初躋風流賞會已標白下之宗吐納冲和又得黃中之秘錦筵蔽日華轂駐雲小山桂樹重開招隱之鄉流水桃花別有藏真之境降湘瑟於龍渚轉緱笙於鳳臺銀潢左界霞裁織女之綃紫氣西來日朗真人之牒四子爲之講

德八公聞而授詞金光滿把遙分日月之華銀字雙填更奏煙霞之曲奉勞玉羽寄侑瑤舟其詞曰

想龍舟汎浚梅雨新晴鳳林凝綠翠扇朱樓隱萬竿修行江瀉瓊巖山開綉障  
啓洞天金谷七葉貂蟬五湖魚鳥四筵珠玉 信是人間如公希有山林鍾鼎  
一生兼足賓客文章享太平清福淮海南飛錦字相將向楚雲遙祝從此江東  
百回高宴醉招黃鵠

右調 醉蓬萊

壽蘇山陳公障詞

并引

伏以慶源日引時當長養之辰福地天全世際昌遐之會奕葉流光久著煙霄  
之望四方爲則咸瞻海岳之標含冲所以葆和積厚宜其受祉傳家牧伯住世  
神僊恭惟執事三楚人龍兩都德鳳楷模政府領袖儒林郢中寡和風高白雪  
之篇日下無雙代表青雲之業漢策登科洞天人條貫周官分屬掌華夏之

輿圖隼旟文軾普甘雨於齊方豸繡彫戈肅清霜於晉徽志遂功成心如白水  
機忘慮澹跡戀蒼山勢關飛動吞雲夢於毫端趣入虛無臥瀟湘於畫裏古木  
回春已驗當年之兆靈禽報喜更開繼體之祥總此休徵鍾於哲嗣載遵嚴訓  
惠我疲民凡治郡之敷宣多過庭之指授瞻彼畚田知是稻粱之本譬諸飲水  
敢忘江漢之源茲者道情大暢夫優游神理益扶其健爽花甲周天喜見稀年  
之近林鍾應律正當望日之先沸綠野之同聲薦黃堂之異典合郡幘幘既切  
二天之戴四民歌舞咸承兩地之歡况在吾徒彌勤此念是用寓寸衷於樂曲  
介薄敬於郵筒聊以纖毫言申萬一不慚下里冀達高筵揄揚橋梓雖微金玉  
之章模寫松椿竊比丹青之筆請填銀字奉代瑤篇其詞曰

望高海內表荆楚甲第簪纓相續袖拂紅塵早管領文酒山林清福家有人焉  
付之經濟用世心先足三槐手種濃陰滿地凝綠 看取千里長淮萬民都仰

賴鯉庭餘澤拜手雲天盡皆言難報太翁之德日月岡陵舉杯齊向我郡公遙

祝年年此際丹心南寄黃鵠

右調百字令

皇早曾諭文選山林

壽熙臺潘公八袞障詞

并引

皇早曾諭文選山林

伏以陰陽順布天儲海岳之精星斗光昭地啟江淮之瑞故運合半千自協降神之兆時推第一益延駐世之期鄉邦仰茲達尊朝野推爲大老恭惟執事七業儒家四朝道望兩間正氣三代遺才決科簡策奪郗桂於璇宮簪筆縑囊指堯奠于鎖闥屢排巨蠹寧恤批鱗孤忠圖報惟憂大厦之傾直道逢危竟舍修門而去半刺雖煩已表具瞻之望前途自遠益虔奉職之心喜聖主之當陽拔賢臣于養晦考牧優崇尙是回陽之日叅藩敷歷初占嚮用之辰俄方岳之兩登繼中臺之孤晉言康外服載撫中州官資數易常堅有恪之衷世變多端彌亮不撓之節凡夫國典公條發揮愈炳但屬民艱政蠹鏟剔無餘有爲卽是芳

規到處擬之明鑑綜理洪纖寧曰士衡專美激揚清濁皆云孝肅重來身與衆  
爲金湯手挽民于水火文以經猷每變從邪之俗武能靖亂終成盪寇之功在  
予固號深知更僕豈能悉數方欣令政已困煩言拂袖鴻冥束書豹隱反已無  
慚惟飲官中之水在公有給積爲郭外之田招舊侶于松樓謝閒人于草徑安  
可遺家便作後昆之計動而成範自存先輩之風立忠賢兩地之祠裒文獻萬  
年之典考彼平生諫草二編見矣垂之他日庄居三記昭然諸多積德行仁用  
合凝真葆命龍馬精神健壯有加于少日鳳皇儀采輝光獨瑞於今時初登八  
表之年匪獨一家之慶松歷千齡覽孤標之傲歲梅苞十月先萬卉以窺春某  
等久承烏履之塵兼奉盤盂之教期公有祝謂我能文歐筵稱賀敢自吝乎坡  
詞韓筆憐才况欣聞乎鳥句遂歌長調用厭群情其詞曰  
魯殿靈光喜熙翁大老鎮我邦國三十年前人望秉鈞當軸誰遣歸來雲谷平



白地卷却經綸城南料理松菊  
素懷冰玉想眞宰應須鑒賞  
一生心曲管取  
長年何必向天求卜先種三孫之福喜祖武書香聯續更待取門遠青雲鳳鷁

飛起梧竹

右調萬年歡

賀笛翁太丈七十壽詞

并引

隆慶庚午我笛翁丈人壽晉七袞七月二日是維初度之辰內族外姻遠近賓  
客咸來賀咸以謂淮之有葉肇自浙東宋則丞相發源而樵雲先生復以隱鳳  
夢麟曜于元季儲祥緼祉大顯我明宮保振其鴻猷司寇標其淑望翁司寇之  
良嗣也維茲甲族實望吾淮而翁又以周大鼎魯靈光爲葉之鎮不其盛哉小  
子則以翁之所履有三處則爲貴公子出則爲賢士夫倦而歸也則爲鄉耆俊  
而平生之節則又有三變何也故方其少也志意所嚮雲興電飛躍俊騎韞名  
鷹雄劔良弓輝映馳逐江湖游俠時候于其門異端方伎目列于其前顧盼指

靡應接有不暇者人則羨其豪既而所之既倦謝遣故常懸箔而有琴棋揮金以收書畫橫長笛撰小詞尋奇春雨之亭避俗水西之館論襟投分皆海內知名士也則又豪而變爲逸及夫世事改矣夙心灰矣目前萬幻付之雲煙于是木鷄獨全其天芻狗泛觀乎物我忘冠裳冠裳忘我人勞機械機械勞人嗒然一室不知孰爲是耶孰爲非耶則又逸變而爲達嘻翁亦何嘗變耶變者其花葉不變者其本根故仁以恤夫窮義以樂夫善任夫真耻出於詐尙夫德不懼于強方其乏則朝儲忘乎午殮時其豐則食客倍于家衆輕財重義之致蓋童而白首者也而亦何嘗變乎今翁雖七十在它人則以爲稀以翁之早嗜大道屢逢異人掌握天機保合元氣猶日之高春也庸有量耶承恩締姻門下余四十年在行則甚卑而翁顧禮之爲上客念無以爲報者今衆徵言以爲祝正小子之心也謹歌以侑尊其詞曰

畫樓凝眺昨日秋來到良燕會齊歡笑餘甘回蔗境老健添松操新涼嫩梧風  
輕岸烏紗帽 三賢公子道八葉傳家教更滿目孫枝紹鳳麟清世瑞龍虎玄

關妙真奇事白頭會見重年少

右調千秋歲

壽丁忍菴七十障詞

并引

伏以營生塗曠沉冥所以達生應世精勞戒定謂之超世故結駟而遊是有塵  
勞之癖牽牛而飲名爲山澤之癯亦豈若羲皇獨契其衷張單兩違其病木鷄  
天性芻狗世紛欲求之於泉石方依日月之光將槩彼爲市朝又帶煙霞之氣  
於瞻上逸足表名區恭惟執事天與神機道存輜重龍蛇混俗魚鳥遺形冥通  
典冊早遊甯越之門小用經綸深入計然之室義餉千金占羽林之上籍禮榮  
束帛介璧水之初筵士行坐惜乎分陰公藝同居乎五代用貴善藏受教穀城  
之石智弘無垢歸心祇樹之林仁風夙振乎閭閻雅道益光乎宅里何以文爲

任鴻鈞於太素我唯勞止貽燕樂於曾玄茲者昌遐才啟夫七旬喜樂載逢乎  
初度孟月觀星方躔析木良辰紀日首數舒蕙緇塵變盡逾堅貞白之姿義馭  
遄飛猶是高春之候問楚國於南華冥靈有樹指梵天於西竺優鉢初花<sub>某</sub>等  
或聯孟氏姻鄰况是荀家誼故情期善禱義假蕪詞公卿有種已占協夢之松  
壽考無疆重睹歸家之鶴請歌堂上用樂尊中其詞曰

小春天氣簾捲梅風細玉樹繞斑衣麗青山長歲月綠酒閒生計齊勸道一杯  
一曲三千歲 萬緣今已遂終日惟消醉家有寶人之瑞花濃東野步日暖南  
窗睡歡樂也白頭笑看兒孫貴

右調千秋歲

壽陳湖東七袞障詞

并引

伏以世華可駐悅生爲駐世之階性率難凝繕性是悅生之寶故靜執其樞萬  
緣俱會壽徵於相百福咸來恭惟執事道際道融機藏機湛卷舒入境解脫天

弢激昂星斗將呈鳳鶴之文吐納風雲蚤戢蛟龍之氣野馬紛馳豈緇塵之可  
冒沙鷗自狎信碧渚之堪娛禾登穰稔之場竹嬾篔簹之谷香地朝熒靜習焚  
修之灑杖黎時倚閒披種樹之書兼且鄉井激其義風湖海孚乎雅望大漢馳  
聲百金比諾小邾服信千乘無盟門飛好禮之名家篤授經之訓夢筆西臺擢  
瓊林而可接抱琴南序映碧水以方升茲者七袞紀乎昌齡八月屆夫初度爰  
期上壽况值中秋霓裳丹桂披妙舞於翔鸞玉杵玄霜薦靈丸於顧兔千里嬋  
娟人比重輪之滿九州豐阜時當萬寶之成某等絲蘿荀氏之親膠漆雷家之  
舊欲揚厥祉過謁余文芳筵雅調寧須窈窕之章旨酒嘉賓共醉團圞之影益  
增甲子先和宮商詞曰

瓊樓絳闕筭三五清光今夕真別人在蓬壺銀海冷鋪冰雪大家齊向姮娥說  
願長生寶薰濃蕪鮫茵乍展獸尊競倒鳳笙吹徹 仰金粟天香妙絕看付與

僊郎一枝高折老子踈狂酩酊漫酬佳節興來閒引湖東步愛瘦筇隨手如鐵

一年一度循環燕賞對它明月

右調桂枝香

壽許逸菴六十障詞

井引

伏以風高湖海人瞻世表之英義重鄉邦天啓區中之瑞道有樞機得意尋常  
之外心無畦畛收功方寸之間素履坦其脩途佳境恢乎壽域誰爲達者茲有  
人焉恭惟執事係衍高陽胤宗大岳兩淮鉅望上郡名家業精貨殖時班百乘  
之封功濟均輸歲辦千金之課季布馳名重山東之一諾計然授術多江上之  
三遷庸行更篤乎彝倫雅範每嚴乎家法手撫三荊各奮風雲之勢心傳四桂  
齊含月露之芳深心暗合乎典墳大器無勞乎藻績意氣干霄雖萬人而必往  
規模善世合百口以同遵祥符叶贊乎令圖善養增培乎異稟寶籙琅函預卜  
椿齡之永瓊危錦薦欣當花甲之周是月也農田咸樂乎有秋曆府載躔乎初

度三葉階，莫先舒九月一枝籬菊。預報重陽華轂爛，其盈門斑衣翩而繞膝。日  
飲無何喜精神之益，王天緣已足慶福祿之方來親友<sup>某</sup>等或聯桑梓高源或  
襲芝蘭密契倚玉同芬或締陳荀之好斷金投分或通王貢之交俱有感於靈  
長自朋興乎暢悅欲前頌禱爰假聲歌東山絲竹重翻南極之篇北海尊疊共  
結西湖之賞腔填小令禮賀長年其詞曰

晴湖一望朱簾卷秋淨楚天清曉綺席高張樓閣裏五色瑞煙繚繞郭索螯肥  
玲瓏曲麗景與人同好四筵豪傑金尊宜共傾倒看取以逸名菴逸從勤後  
得守家之寶炯炯雙瞳顧盼間人羨江湖儀表笑問黃花香苞開也未夜來多  
少一年一度洞天長醉蓬島

右調百字令

壽王可齋七袞障詞

井引

伏以修真有道立符天地之機積德無爲妙感神人之應故雀躍雲衢或失區

中之適龍驤世路殊乖物表之游在內外之兩忘斯古今之特盛爰求達者茲  
有人焉恭惟執事立牝棲神黃中繕性志先利濟用合經綸青箱綠簡曾參鄒  
魯之宗玉扎丹砂遂啓軒岐之秘牛刃三年識庖丁之節奏羊腸九折善伯樂  
之馳驅精微得於細心拯球知其仁術坐致豐年姚宋太平之相前無堅敵桓  
文節制之師有求卽赴郤遠道之乘輿無病不醫謝貧家之報幣得手應心奚  
事揣摩之計入經出傳耻爲孟浪之談衆方囂兢我獨安和俗事浮華吾仍儉  
朴夜月清齋鼎伏松精之火春雲燕坐簾縈柏子之煙茲者庚申已勝乎三彭  
甲子載登乎七袞有歡初度言兆遐齡年由此晉值吾師從心所欲之年月極  
其良當我佛應世而生之月膝下兒孫慶縣壺之有繼門前賓客喜絜榼之方  
來親交某等欣觀若木之輝久挹如蘭之臭願歌壽祉用假篇章活千人者必  
報立下鑒以無私積百年而後興福大增其未已請填小調奉佐長筵其詞曰



清和天氣麥隴藏鳴雉梅雨潤槐風細門迎朱芾盛庭繞斑衣麗歡聲沸白頭  
人醉昇平世 清閒真有味肯問名和利城市隱山林貴交游無俗轍懷抱皆  
春意從今去慢騰騰地三千歲

左調千秋歲

壽趙與竹六十障詞

并引

伏以玄穹與順方昭錫福之公清世忘機自得延齡之秘性水無波會津梁於  
利涉心田有種收耕穫之良猷至人久矣忘筌壽者寧須見相恭惟執事楚甸  
壯游海陵著性情連璧月思入珠霞筆床茶竈長懷一壑之心蓬矢桑弧久擅  
五湖之氣難兄難弟與竹與梅涓川與庾嶺齊芳射水共邗溝接派子標一鳳  
孫振三龍傳家仍晉國之風猶子盡謝庭之秀助濟人艱常捐菽粟矜憐物命  
惟守蠶鹽白社號小維摩緇流仰大檀越茲者風傳表里慶啓杖鄉梅英報臘  
羨觸事以多歡莫莢司辰覽來期之未艾親友等言申祝頌載假踈蕪城南

瑞采先占福德之門海上清音試聽神僊之曲敬填銀字奉侑瑤卮其詞曰  
線添宮繡正是書雲後晴日麗香風透壺觴諧笑語車馬來馳驟人都道錦筵  
共爲僊翁壽 班斲翻舞袖共擬燕山竇間歲月清時候一方人仰慕兩代天  
成就從今去瓊英壽酒年年又 右調千秋歲

壽賈百松障詞

并引

伏以玄穹與善先徵福德之家清世凝和載暢彝倫之樂天運循環在厚積必  
逢嘉運世途往復諒安行自履亨途名門三代迭興舊望歷年彌大恭惟執事  
器表清明行光淳朴舟車適用金玉稱珍大父則寄一真於元亮世網鴻冥尊  
君則精三禮於漆雕文林鳳起方企非常之遇俄纏罔極之悲肇自遺孤早堅  
遠志扶持同氣激勸齊心非惟不忝其先更是有華於舊式敷庭訓益裕家規  
允文允武齊承蘭砌之歡惟孝惟忠用廣竹林之愛復沾新慶載啓鴻圖中臺

選俊喜驥子之高標上國掄才諒龍光之可待茲者松姿正茂花甲將周弘敞

壽筵朋來賀客一葉添梧異重經乎閏月五株聯桂喜接賞于中秋親誼

某人

久通洛下之家深感淮南之瑞過要蕪語特顧山居仰窺天運同符萬寶之成

周覽人區豈直千金之賀敬填韻語奉戒歡悰其詞曰

真武元長世際新異章

南齋之子樹立今如此當晚節駢繁祉高賞兼黼黻餘慶由經史諸緣足歡娛

之外無他事 清時榮杞梓計日應朱紫高閣閱崇基址壽筵飛玉笋法曲填

銀字逢秋閨一番一醉從今始

右調千秋歲

壽胡母牛老夫人七袞障詞

并引

伏以慶門介祉啓懿範於昌期福地凝祥炳瑞華於壽域天祐陰功允叶簾幃  
之化人修淨業益延閔閱之光心立地以成僊善在家而作佛有華彤史式儷  
瑤編恭惟閣下寶婺降神奇章著姓風行內教日朗徽音東床擇對得鳳舉之

名英中葍宣勞勵雞鳴之至誠仕宦四方長奏贊襄之績紀綱千指爰章保合  
之功繼偕棲隱閒情載撫盈成晚運予手拮据恐墜司徒之緒我心鄭重肯孤  
太守之遺尤高蟋蟀素風益溥鳩鳩均愛群從騰騫挹謝家之寶樹諸郎競爽  
發王氏之青箱交鳴玉佩於兩都或綰銅章於六詔濟美重光教無慙於所出  
傳芳接武兆已應於子歸爛朱紫之盈庭接曾玄於繼世五十年領袖閨門履  
茲全盛一千里提封州縣卓爾無雙在宗姓真魯靈光比衣冠則郭中令羨福  
祿之無疆穰穰已見測公卿之有種袞袞方來茲者脩齡甫屆乎稀年令節又  
臨乎初度周室功裘先開九月漢宮僊佩才涉重陽慈雲叩法竭志向於晨昏  
慧日明心倍精神於往昔問遺篋筐益洽親姻之禮分張錢米彌勤匱乏之家  
某等自惟累葉周親亦是連枝嬌客拂綺席以稱觴紛然寫履賀華堂之戲綵  
總是簪紳取譬南山採華東璧前陳致語後引登歌文林祝頌請聽兩疊之章

瀛海微茫不數雙成之曲試調玉律奉侑瑤卮其詞曰

長淮南北試問取誰是名家居一我舅津翁人都道當代巖廊柱石夫子雙洲  
乘驄建隼名望真無敵流風餘澤白頭閒話當日世味甘苦相兼夫人全福  
德一生飴蜜滿目兒孫天路間渾是青雲人物壽考榮華多應心地種善根之  
力年年秋杪婺星光映南極

右調百字令

壽喬母郭夫人障詞

并引

伏以兩淮攬勝佇遠戀於瞻雲三晉流芳慶長生於愛日故寶婺輝天寧見山  
川之隔瑤編瑞世爰標海岳之奇式開閥閱之祥豈直閨門之範恭惟閣下周  
室分源堯都孕秀同符向傳贊軌融經望承岐下光昭虢叔之孫美儷橋陵作  
配軒皇之裔機絲勸學井臼勤身奉姑奉舅長懷烏報之情宜室宜家聿懋雞  
鳴之戒志矢終天照清冰於晚歲教成再世明皦日於初心控四子之人龍翼

群孫之瑞鳳蓬矢桑弧俱負江湖之氣珠袍玉劍允含霄漢之心屬家慶之已  
多喜壽華之彌進言臨初度用兆無彊賀從茲始邇七秩之二齡復自中來先  
仲冬之一日五色斑衣共稱觴於兩地七籤秘笈知積筭於三山親友<sub>某</sub>等誼  
久重乎通家禮無由而造膝庸申遙祝同假蕪辭河東冠冕載聞禮法之家海  
上笙簫別有神僊之曲請填銀字奉勸金卮其詞曰

雲山天際眇正望入親庭白雲繚繞小春初過了喜一枝春信梅花開早雙飛  
青鳥畫簾外殷勤來報報家園松竹平安雲護壽萱長好 奇妙羨君家福履  
駢蕃晉絳一時真少洞天蓬島天外樂聲縹緲看群僊齊降芳尊玉斝歌舞同  
傾倒更從今百遍開筵永酬難老

右調瑞鶴僊

壽陸母朱老夫人六十障詞

并引

伏以北神保業並雅譽於懷清南極騰輝啟祥源而引壽載咏栢舟已著淮東

之範遙迎桂棹還承江右之歡一鄉扇其德風兩地拜夫家慶恭惟

閣下噉日

明心清冰比操一經手教七傳流徽伯鸞擇對方諧五噫之歌獨鶴含悲永佩

三從之訓二十年門掩芳辰鉛華靡御數千指家雄著姓井臼猶操能勤能儉

味采葛之嘉音明禮明詩襲絳蘭之懿矩天諒中襟甘出受辛之後人高內則

慶占積善之餘喜六袞之初登偉雙雛之有立一則夫志欽承命奉小郎之杞

一則親心能體逾高大父之資俱榮璧水之游兼是瓊林之彥書卷筆牀遠遡

龜蒙之達茶經泉品無慚鴻漸之高茲當懸悅之辰甫度穿針之候庭戲斑衣

挹天香於建業厨炊白粲就國養於成均由斯花甲之周直抵松喬之歲雨露

長垂溥華滋於奕世煙霄可接覽奮發於諸孫親誼

某

等久瞻孟母之光有介

陸郎之隔願言馳頌因假填詞斑駁江上遙欣玉笋之飛青鳥雲間應有金支

之降徵符鶴鹿寄語鱗鴻其詞曰

有宋大儒記鵝湖勝蹟天啟朱陸淮海名家遠出大儒之族共羨夫賢婦淑奈  
塵掩鏡鸞孤獨香閨鎖二十餘年清蟾冷照霜竹 天心眷德相將看家成子  
立領取多福百歲爲期甲子近方登六秋曉綵衣南國瑞氣迥淮山遙隔萬年  
歡一曲僊音渡江憑寄黃鵠 右調萬年歡

賀高仰山生孫障詞

并引

伏以錦堂襲美方流閎閎之光繡闥呈祥蚤衍庭闈之慶秀表八男映奇標於  
桂子福開三世振瑞采於桐孫覲天運之良辰饗人倫之至樂恭惟執事三晉  
名家兩淮巨望動循矩矱德茂鏃基長鳴龍劔風馳襄邑之豪光動鷺袍續著  
地官之屬廕美椿庭麗清泉之上幕節高萱室承宋室之華源偉冢嗣之異姿  
啓賢關之高步載隆家慶更荷朝章季子雲樓君香含泮水之芹譽重燕山之  
桂近徵蘭夢喜握珠靈親友 某人等素通密勿之襟幸覩駢蕃之慶欲歌嘉事



遂假蕪辭清尊玉醴共申此日之歡朱芾金章用兆它年之賀請填銀字奉送  
瑤舟其詞曰

汾水通靈澤眇山川風雲在望故家喬木弧矢四方宜遠志鳳舉鵬搏南國淮  
浦上高閔華屋揮霍江湖饒氣槩更衣冠禮樂標名族爲善樂萬緣足 多生  
種下多男福快階除森森奇樹四環珠玉又見芝蘭纏瑞靄添上一枝新馥和  
氣滿祖庭梧竹不惜黃金收萬卷看白頭勸課燈前讀光門第擁袍笏

右調賀

新耶

贈趙學師歸田障詞 并引

伏以人區局束逍遙蹈乎大方塵海動勦流浪謂之冥化夫勞我者形圭組更  
勞形之物立予有命市朝非立命之鄉通人鏡其上機關者拘於未解觸鬪蠻  
征競叩囊中之智鶴長鳧短徒興物表之悲雞虫之得失無期燕蝠之爭衡不

已鑿炳丹青寧知目睫時來朱紫幸摘頷頤夢九關而直上海濱之大藥難成  
倚叢桂以旁招淮上之小山空賦漢壘猶虛城下之漁共笑郢都未入蘆中之  
餓誰憐殊不知桃花咏就玄都之燕麥先搖竹簡銘殘逆旅之黃梁未熟卮酒  
畫蛇後先奚定群狙賦芋喜怒奚爲此先生所以三嘆而輕鼎彝一笑以逃蓬  
藿希心龍臥矯翰鴻冥識歲星於史隱則半壁可以藏身懷靈境之臥遊則單  
車忽焉就道地水火風悟本來之未有嵩雲海月亮歸去以疇爭爲兒孫耕讀  
之師指童子釣遊之處又何必帖耳鹽車聽麾呵於奴隸媒身藥籠借效唾於  
公卿也哉門人<sub>某</sub>等眷教愛之久承悵離悰之早積有懷入室忽嘆殊鄉丈夫  
之於知己寧忘解劍之心弟子之事先生亦有賡歌之禮請陳犯輟用佐稱觴  
其詞曰

問訊淵明折腰吏爾能爲否獨不見輪雲頃刻白衣蒼狗三逕猶存籬下菊五

株不改門前柳漫淮南桃李照東風空回首  
名與利慵開口榮與辱真翻手

筭書生幾見印懸金斗百計不如歸去好  
一生但願樽中有儘平生豪氣向誰

消無過酒

右調滿江紅

詞

如夢令四闋

明月曉霜鋪地壓樹亂鴉飛起遙憶畫樓中  
今夜峭寒知未鴛被鴛被香擁玉

人嬌睡

柳外數聲啼鴉風舞隔簾香雪睡起沒心情  
又過牡丹時節傷別傷別碧草煖

煙飛蝶

樓外碧波千頃正對客心孤迥遠樹斷雲橫  
簾捲紫金山影秋暝秋暝漁笛一

聲煙艇

何處玉簫聲咽欵枕暗驚離別簷外鶴歸巢松頂踏翻晴雪重疊重疊梅影滿  
窓橫月

點絳脣五闋

小小樓居瑣窗暖覺東風早數聲啼鳥報到花開了  
沉水飛煙細逐遊絲裊  
閒凝眺碧波雲眇天際連芳草

小小樓居出簷蕉葉新如沐嫩篁奇木簾影齊含綠  
薤簾琉璃寒映冰盤玉  
高眠足倚風橫竹三弄瀟湘曲

小小樓居客來正值黃花放落英新釀坐有陶元亮  
醉撫闌干笑對冰輪望  
金風颺桂香飄蕩疑在瑤臺上

小小樓居開窗曉起驚奇絕粉明城堞雲霽連山雪  
淨掃瓊瑤細碾龍團潑  
銀瓶熱一甌香啜坐待梅梢月

拜月亭前年年欠下相思債好無聊賴斜倚闌干待  
待月心情祗恐紅兒解  
闌干外乘他不在小語深深拜

浣溪沙六闋

一枕餘香綠綰絲櫻桃猶帶宿胭脂小窗睡起泥人時  
無處可藏羞態度十  
分倦動弱腰肢凝眸花影入簾枝

紫筍成竿過粉牆碧梧垂葉蓋銀床朱樓倒影入金塘  
鵲尾閒添龍腦潤兔  
毫新潑鳳團香畫屏欹枕看瀟湘

雙鳳慳紅印落花金蟬垂綠閃飛鴉翠痕分黛月初牙  
春恨暗消蝴蝶粉夢  
魂偏怯守宮砂要知心事問琵琶

紈扇泥金畫鳳凰寶釵簪玉刻螳螂繡羅垂帶結鴛鴦  
幾點落花閒佇立一  
雙戲蝶細端相心頭暗有好思量

愁入春痕澹拂蛾香堆夜枕綠盤螺嬌含笑臉俏生渦  
經曾遇眼傳波隔花又送一聲歌

粉沁芙蓉襯額黃金盤翡翠貼釵梁新來偏學內家粧  
忽地見人剛匿笑回身簾下半遮藏好風吹過繡裙香

菩薩蠻四闋

闌干曲曲明金碧佳人樓上憑闌立樓下忽聞聲芳心悄自驚  
院深人不到鶯度花枝裊默默俯花枝黃昏將雨時

羅文玉繭泥金漬綵毫剛寫相思字閣筆掩香襦輕輕彈淚珠  
衡陽雲雨暗箏柱空排鴈金鎖下威蕤書成知附誰

綠雲香壓螭螭領紗窗寶鏡搖燈影金穗剔瑤簪重將錦字看  
徘徊蘿幌曙閒共紅兒語莫放繡簾垂待他雙燕飛

玉臺捧出團團月回鑑照見眉前雪紅錦繡鴛鴦深深抹軟香芙蓉雙掩扣

綵綫鬆金豆試問爲誰鬆低頭蹙遠峯蘇眼淚香重襟綉字餘

粉香雲綠多少春拘束被掩絞綳金六幅露出兩鈎紅玉

夜深雨倦雲僝朝

來一枕春酣餘味猶甜夢覺新嬌早透眉山

西江月四闋

玉杆玄霜粉膩水輪金粟香幽孩兒心性最溫柔雅稱談餘酒後一縷才飄

旖旎通身盡是風流丁香吐出廣寒秋滋味要人消受

右香茶

古岸垂楊釣艇小橋流水踈籬杏花茅屋舞青旗人道他家好醉人日暖黃鸝

共勸雨餘紫蟹偏肥歸時拚箇典春衣抱着瑤琴且睡

昨夜神遊何處翛然與鶴俱升天風吹碎珮環聲兩翼晴雲穩控俯視乾坤

一氣歸來星斗三更梅花紙帳月籠明鶴與先生同夢

右爲夢鶴道士作

恨殺湘江斑竹誰教織作垂簾綠楊門下有嬋娟無奈被他遮斷  
隱隱如聞  
珮響些些祇見鞋尖何當得地被風掀露出嫦娥半面

### 浪淘沙

駕箇小湖船放入湖天月輪今夜十分圓看得嫦娥才仔細恁的嬋娟  
爛醉  
扣船舷信口成篇滿身風露桂花煙不縱詩狂并酒興不是神僊

### 雨中花

檻外芭蕉初過雨又簾捲夕陽奇樹見萬頃琉璃殘霞散盡白鳥雙雙去  
客  
到瓦壚烹日注漸坐久相看無語正一片松風滿輪蘿月都在泉飛處

### 踏莎行二闋

繡頸眠鴛紅襟舞燕錦鱗戲水吹花片夭桃開遍小池東一春深鎖秋千院



銀蒜簾櫺玉葱針線沉煙不出圍屏扇楊州鏡子有何緣時時長與他相面  
小婢煎茶小僮磨墨老郎暫到華胥國午槐風外咽新蟬覺來簾影搖輕綠  
墨瀋初調茶鐺已熟一甌徐引行捫腹兔毫閒後鼠鬚忙南窗試寫生綃幅

蝶戀花

紅粉圍牆開小院楊柳垂簷齊罩黃金線斜倚門兒遙望見見人笑閃芙蓉面  
獸嚙銅環扃一扇香雪嬌雲苦被閒遮斷忽地一聲聞寶釧隔簾彈出飛花  
片

臨江僊五闋

幾載含香光省署隼旗出擁朱輪一丸靈藥壽斯民宵中眞雨露散作鳳城春  
寶帶內家新刻玉殷勤留待功臣他年事業在經綸錦袍圍戲蟒偏稱畫麒麟

麟

右壽圖翁

世傳七夕星家節斗牛以此爲期又言橋外雨霏霏是他離別苦相見亦悲啼  
此事有無君莫問古今多少分離與君開抱且啣杯其間懷恨處唯我最能  
知

右七夕

本是錦官城裡住杜陵欲賦難工却勻顏色嫁西風嫌他秋冷淡試爲點春容  
好似粧臺相遇處玉纖脂粉香濃儂人一捻俏心通蕭郎羅袖上印下斷腸

紅

右秋海棠

嘗恠西風無意緒爲何搖落千山天工不放地靈閒才教金作粟又遣玉爲簪  
好似畫樓相送處柳絲斜月雕闌牽衣無奈語喃喃贈郎郎記取拔向綠雲

鬢

右玉簪

屈指重陽將近也五更四壁寒蛩佳期十遍一無成胡笳空撥盡半是斷腸聲  
一寸芳心些子欠相思點在丸中銀河曲曲漫斜橫何時當七夕雲雨會雙

星

右小字諱九

千秋歲

柳條金軟霽雨輕煙暖樓獨倚簾親捲歸鴻鄉信隔芳草閒愁遠情依約寸心  
剛被春拘管別來風景換屢見銀蟾滿憶共飲薔薇館欲行頻目送未語先  
眉歛登臨處春江偏照春山淺

風入松三闋

妖紅膩白映霓裳富貴說明皇沉香亭畔春如畫清平調占斷風光妃子太真  
歌舞侍臣李白詞章溫柔到骨是花香金粉內家粧憑闌不恨開時晚天留  
意殿取群芳試問上林桃李不知誰是花王

右牡丹

洞簫一曲倚聲歌狂殺老東坡畫船占斷湖心月杯中綠先酌嫦娥試問滄洲  
寶鏡何如鵝鵲金波筆端萬象困搜羅無奈此翁何玉堂回首驚殘夢無心

記往日南柯想見年來江上桃花亂點漁簑

右和文衡山石湖夜汎

東華塵土撲朝衫車馬鬧長安先生箇裏元無分黃紬暖睡穩茅庵書几莊生  
秋水畫屏米老春山 農家官府寄林間居士繫頭銜經常自有閒功課煎茶  
具藥籠花籃舊管園蔬數畝新收野竹千竿

滿江紅二闕

瑞雪華雲醞釀出素容幽性記折取一枝春色醉中吟弄莫道東風開過了儘  
後來紅紫難相並看淡煙微月細生香水心映 玉手顫風流興翠羽喚相思  
夢百花中先占却粉清煙淨載酒尋芳誰不賞筭知音只有林和靖待歸時飽

玩壽陽粧臨清鏡

右賦梅寄人

窮眼摩挲知見過幾多興滅紅塵內翻翻覆覆孰爲豪傑傀儡排場才一出要  
知關目須聽徹縱饒君局面十分贏須防劫 身漸重頭顱別手可炙門庭熱

旋安排嬌面孔冷如水鐵儘着機關連夜使一鍬一箇黃金穴被天公賺得鬼  
般忙頭先雪

如夢令

題海棠

微雨澹煙芳逕簾外一枝斜映銀燭照殘粧鈎引紛紛脂性如夢如夢紅濕錦  
官愁重

又

題梳子

報道小齋禪友開遍南風香透插向鳳頭釵一朶折來纖手中酒中酒頻傍綠  
雲輕颯

卜算子

題水仙

玉立小娉婷默默含情素出格風標入骨香祇恐梅花妬雲旂洛水妃羅襪  
凌波步夢破江天月滿窻暗誦陳王賦

菩薩蠻

題桃花

人人盡道錢塘好西湖堤上春光早楊柳裊青絲濃粧間柳枝  
六橋香不斷  
處處東風面十里錦霞天多情映畫船

又

題黃菊

金錢買斷三秋景素屏銀燭鋪鐙影似醉要人扶陶家有此無  
夜深香繞袖  
偏愛寒英瘦日日是重陽高歌錦瑟傍

浣沙溪

題百合

昨夜惜騰入醉鄉覺來微月射藤床小齋恠底忽聞香  
陣陣鼻端來旖旎森  
森心地也清涼一枝元在枕屏勞

又

題石榴

密葉深藏棐軫房高枝亂綴絳紗囊休言饒色不饒香  
試看秋成催結果一

苞瑪瑙貯天漿請君白馬寺中嘗

臨江仙

題紅梅

春氣着花如醉酒寒枝吹出穠芳羅浮仙子素霓裳丹砂先換骨朱粉旋凝粧  
顏色雖殊風格在一痕水月昏黃百花頭上占排場問他桃與李誰敢雪中香

生查子

題芙蓉

春風艷百花春晚花惆悵獨有一枝紅秋晚花纔放  
煙明蜀錦機波冷鮫綃  
障試問倚雲栽何似秋江上

鷓鴣天

題玉蘭

楚客爭誇九畹方天宮圖上素娥粧仙姿綽約知誰種酒性溫柔別有鄉  
明月珮白雲裳夜涼小閣對清揚羨他已是無瑕玉又占花中第一香

沉醉東風

散玉軸烏皮棐几護牙籤青錦簾衣茶鑄颺竹烟紙帳薰花氣點屏風燕窠香  
泥鶴舞蒼苔客到稀不管事先生睡起

醉太平

紫絲韜玉驄黃金索白鷹銀絲纏箭錦囊弓耍南村北壠醉歸來雪夜貂裘重  
玉天僊擁入花胡洞映珠簾兩道絳紗籠被笙歌鬧醒

水僊子

枇杷日射紫金丸荷葉波搖翡翠盤芭蕉風動青羅扇小池亭近午天隔紅塵  
百尺飛泉蛟綃捲涼生珍簞雀舌煑香浮玉盃麝烟飄雲裊珠簾

紫鴉鶻鉄爪帶金鈴綠鸚鵡瓊鈎掛翠籠錦驂騮玉勒搖絲控簇紅粧繞畫屏  
鏤檀槽象板瑤箏雲液酒羊羔碧甕水沉煙龍文寶鼎月團茶鳳嘴銀瓶

送我入門來



玄鬢垂雲忽然而雪不知何處潛來吟嘯臨風未許壯心灰嚴霜積雪俱經過  
試採取梅花開未開安排事付與天公管領我肯安排且狗有三升糠分馬有  
三分龍性况丈夫哉富貴無心祗恐轉相催雖貧杜甫還詩伯縱老廉頗是將  
才漫說些癡話賺他兒女輩亂驚猜

永遇樂

道韻雍容天襟澹泊自昔如許數載淮南滿門桃李多謝三春雨平生不喜揚  
揚皎皎可對蒼天相語是誰教繡衣持節頻頻皂囊旌舉 麒麟步武鳳凰毛  
羽須待網羅爲主滿地江湖尋常行隊顧豈無伊呂漢陰抱甕甘心骯髒已幸  
有人知汝况而今求賢正渴聖人當宁

右鄭掌教膺獎

駐雲飛四闕

天下才名綠鬢朱顏正後生花外笙歌送闕下旌旄從榮宮錦賜袍紅笑領東

風白馬驕嘶不受黃金控十二天街畫裏行

右及第

人世蓬瀛兩袖天香近九重寶帶銀魚控宮燭金蓮送

榮

談笑揔夔龍退食從

容日上花輓閣下文章靜身在瑤臺第一層

右翰林

黃閣清風新築沙堤宰相行掌握乾坤重燮理陰陽正

榮

雨露滿槐庭桃李香

濃鎮國璠璣照世軒轅鏡圖畫麒麟第一名

右內閣

霖雨收功回首三台一笑中白社怡真性綠野耽幽興

榮

天賜袞衣東四海人

情指望閒雲復爲蒼生動重見周公致太平

右歸隱

滿庭芳

春遊

山間水涯鶯遷喬木燕剪香沙東郊過雨春如畫碧草丹霞

一

壁廂

馱紅袖銀

鞍細馬

一壁廂

舞青旗茅店桃花垂楊下傳杯弄壺不醉也不歸家

南呂一枝花

壽丁忍菴七十

唐時萬柳池 晋代燒丹竈 劉朝招隱地 宋室等僊橋 城壓金鼈 最好是淮陰道

引黃河一水遙 愛你箇 天生來地上 神僊住居在 畫不就人間蓬島

梁州

有時價 載春水斜陽蕩漿 有時價 倚西風夜月吹簫 今年七十剛來到 朱顏未

改白髮相饒 花間翠羽洞口清霞下 天風一派雲璈 有一箇 丁野鶴笑迷喜親

捧靈芝 有一箇 丁令威舞翩躚 閒尋華表 和你箇 丁忍菴醉糝糊 戲弄蟠桃綺

寮絳綃梅花十月東風繞 綵袖翻玉樽 到等待寒香月滿 稍拚取酩醕

罵玉郎

青山不用丹書詔也 不要 金帶重紫騮 驕芒鞋竹杖閒行樂 一任他 鷗鷺狎燕

鶯嘲漁樵笑

感皇恩

呀 雖則是萬貫纏腰也有那烏帽羅袍心只願跨青牛揮玉塵伴黃鶴說甚麼

心靈性巧說甚麼位重高官見了些蟻排兵聽了些鷄報曉嘆了些燕爭巢

探茶歌

見如今 庭下有桂香飄麒麟種鳳凰毛待桃花鼓動禹門濤密匝匝門迎駟馬

那時節 五花官誥下丹霄

尾聲

任從他眼前人海風波惡都在你心上經綸忍字包不惹事的先生得玄妙那

怕你 桑田幾遭再饒箇華山千覺我只是靜養天和不肯教老

梁州序 咏雪

連天一色隨風千變六出是誰裁剪世間何物比他皎潔輕纖漫道是銀龍墜

甲玉鳳梳翎粉蝶兒飛撩亂素娥粧閣上倚嬋娟錯認楊花撲繡簾合清幽景

最堪戀向銷金帳底同歡宴羊羔酒美人勸

溪山如塑園林如染樓閣盡行粧點憑高一望白雲鋪滿瓊田

見了些

水晶宮

闕雲母軒窗瑩徹琉璃殿

更愛那

疎離茅店外小橋邊斜壓梅稍映畫帘

合前

伴清光唯有殘蟾漸略約東風催轉笑遠山微露半痕眉淺

倚猶白

鶴迷琪樹

鷺隱水沙蘆鴈驚銀箭漁翁江上晚一簑懸閒載瓊瑤壓釣船

合前

對冰湖表裏山川正老子興來非淺漫試拈鐵笛倚空吹斷

管甚壓

舟回剡曲

兵破淮西打卑田院灞橋驢背上聳吟肩風捲寒花撲帽簷

合前

節節高

曾經祝向天乞豐年天公果肯從人願行方便瑞氣旋占書驗一連三白黃金

賤遺蝗宿瘴消除遍

合

不似春秋月和花時節到了尋常見

燕雀巢

閒烹小鳳團掃來煎一甌香帶余酣燕塵襟換展蜀牋磨端硯吳毫寫入新詩

卷新詩教與山童念

合前

餘音

今霄醉醒懷同伴共鄒枚曾賞菟園草就相如賦一篇

射陽先生存稿卷之四

...

...

...

...

...

...

...

...

...

...

...

射陽先生髫齡即以文鳴於淮投刺造廬乞言問字者恒相屬顧屢困塲屋爲母屈就長興倅又不諧於長官是以有荊府紀善之補歸田來益以詩文自娛十餘年以壽終柰絕世無繼手澤隨亡烏乎傷哉昔人謂生前富貴死後文章先生所值一何奇也文福難兼齊而造物忌多取信矣丘子汝洪親猶表孫義近高弟從親交中徧索先生遺稿將彙而刻之庶幾存十一於千百爲先生圖不朽耳謀諸榮榮以張子以衷蔡子世卿皆辱先生忘年交者相與校焉夫三子何能供是役哉魚豕之訛不免矣獨念先生嘗謂近之刻者類博而不精嗟乎斯刻也倘曰精焉世必有知先生者矣

萬曆己丑仲春七日通家晚生吳國榮頓首書